

# ينە كۆرىشگۈنچە

(حكايلەر تۇپلىمى)

دكتور شفيقە يارقىن

كابل - ۱۳۸۶

### اثر بېلگې لری:

- عنوان: ینه کؤریشگونچه.
- یازوچی: دکتور شفیه یارقین.
- نشر اېتووچی: افغانستان قلم انجمنی
- چاپ ییلی: ۱۳۸۶ / ۲۰۰۷ م.
- چاپ نوبتی: بیرینچی.
- تیراژ: ۱۰۰۰
- باسمه خانه:
- چاپ حقې محفوظ دور.

# فهرست

۱. قلدیرغاچ نثرى تۈپلەم ..... ۴
۲. يەنە كۆرىشگۈنچە ..... ۶
۳. قوتىلىش ..... ۲۲
۴. ابدیت گە قۇشىلگن تون ..... ۳۰
۵. سۈنگى يۇل ..... ۴۵
۶. فاجعە (نمایشنامە) ..... ۶۶

## قلدیرغاچ نثری تۋپلم

افغانستانده گى معاصر اۋزبېك ادبياتىده شو پيئنگچه كۋپراق  
شعريت ترقى اېتىپ كېلماقده و نثرده اېسه مشق قىلهدىگن ادبىلر كم.  
شو جهتدن، دكتور شفېقه يارقين نينگ «ينه كۋريشگونچه» ناملى نثرى  
حكايه لر تۋپلمى كته ايجابى حادثه دير.

دكتور شفېقه يارقين تانيقلى عالم، مترجم و ايكى تىلده: اوزبېك  
و درى تىللريده شعرلر ايتووچى شاعر دير. تۋپلمده گى حكايله لر، او نثرده  
هم موفقيتلى ايجاد قىلهدىاتگنيدن دلالت بېرهدى.

حکایه لرده طرفه حالتلر، قهرمانلر نینگ خط حرکتلری، درد و اضطرابلری بیانی طبیعی دیر. افغانستانه عادی کیشیلر، اینیقه عیاللر نینگ آرزو-ارمانلری یبر یوزیده گی برچه عیاللر نیکیدک ایزگو و بېغبار بؤلسه ده، لېکن اولر ناتینچ جمعیتده چیلپرچین بؤلیشی، برادرکشیلیک اوروشی مشفق قیز - عیاللر باشیگه سالگن ایریلیق و جبر و جفالر مهارت بیلن تصویرلنگن.

یازوچی افغانستان اؤزبیکلری نینگ تاریخی خاطره سینی عکس اېتتیریشگه هم اعتبار قره تگن. مثال اوچون «ینه کوریشگونچه» حکایه سی قهرمانی تېمور اؤغلیگه «بابر» نامی قۇییلگنیدن قووانیب: «قنى اېدى، اؤغلىمىز هم بابرشاه دېک اتاقلی شاعر بؤلسه!» دیدی.

تۇپلم، افغانستان اؤزبېک تیلی نینگ بايلىگى، ادبى امکانياتلرى کته لیگی، بو تیلده نه فقط حکایه و شعرلر، بلکه بیتوک نمایشنامه، قصه و رمانلر هم یرەتیش ممکن لیگینی اثبات قیلەدی.

یازوچی و اؤقووچیلرنی افغانستان اؤزبېک ادبیاتیده آله تشلنگن اریزگیولی قدم بؤلگن «ینه کوریشگونچه» تۇپلمی نشری بیلن صمیمانه قوتلەیمن.

## دكتور غلام کریم

اؤزبېکستان یازوچیلر اویوشمه سی عضوی

ینہ کۋریشگونچہ

بەھار كېچەسى. كۈكدە تۇلون آى سۈتدېك ياروغلىگىنى يېر  
يۈزىگە يايىدى. ھەر خىل يۈلدۈزلەر - اوزاق، ياروق، كىتتە، كىچىك، جالالى،  
جلاسيز، يىكە، قۇشە يېرگە قرەب كۈلىپ تورگن دېك كۈرىنەدى. گلە-  
گن درختلەر كېلىنلردېك يىسەنىپ قۇلاغلىرىگە سىرغەلەر و يىلكلرىگە  
يىلرزيك تاقىپ، آق كۈيلكلەر كىيگن. بەھار يېلى، كىچىك شۇخ بالە لرگە  
اۋخشب ھەر چېچك نىنگ ساچىدن تۈتىپ تارتە دى و گلە گن درختلەر  
يالە لرىنى سېكىن سېكىن قىمىرلىتىپ اۋتىپ، رىنگمە - رىنگ گللەر ھىدىنى  
اۋىنىپ - اۋىنىپ اۋتەياتگن يېرلرىگە ساچەدى. باغدە كۈكرگن اۋتلەر  
كېچكى ياغمىردن سوو ايچىپ، تازەلىكدن يۈلدۈزلەر ياغدوسىدە جرەقلب  
تۈرىبىدى. جىم جىت لىكنى بىرار قتەلە قىسى قورباقە مى، چىرچىرك مى،

سیندیرەدی و قیتە دن شونەدی جیم جیریتلیک بۆلەدی کە درپچە دن باققە قرەب، اۆز خیال لریگە چۆمیلگن آق بیلک، الکاج ایچیدە شیرین اویقوگە کبتگن آلتی آیلک بالە سینینگ نفس آلگنینی ایشیتیب، قیزغین مەر بیلن اونگە قرەب قۆیەدی. تۆقوز آی دن ببری، آق بیلک هر کبچە شونەدی اویغاق اۆلتیریپ تېمور نینگ خیالیگە غرق بۆلەدی. او بیلن سۆزلیدی، نفس آلگەنینی ایشیتە دی، کۆزیدەگی مەر و محبت النگە سینى کۆرەدی و خیال عالمیدە اونى قوچاغلب آلیب، حسرت بیلن آه چپکەدی.

تېموردن ایریلگنی تۆقوز آی دن آشگن. تۆقوز آی، اۆتیز آلتی هفتە، ایکی یوز ییگىرمە یېتتى کبچە و کوندوز و خدا بیلەدی قنچە ساعت و دقیقە و ئانیە بۆلە دی. آق بیلک، کبچە و کوندوز لرنى سنشدن باشقە ایشى یۇق دېک، قیتە دن و قیتەدن سنەیدی و مونچە وقت اوزاقلیک بیلن تیریک قالگنی گە حیران قالە دی.

بیر کون تېمورجان دن اوزاق بۆلسم، جانیم چیقە دی، یورەگیم تۆختب قالەدی، دېگن اېدیم. قنچە جانیم قتیق اېکن کە ایکی یوز ییگىرمە یېتتى کبچە و کوندوز دن ببری تیریک یوریب من! آدم، گلدن نازک و تاشدن قتیق، دېگن سۆز تۇغرى اېکن. تېمورجانیم حاضر قیسی شەر دە، قندە ییر حالت دە بۆلسە کبرەک؟ آیا او هم مېنى یوخلە می یا کە تانک لر و توپ لر نینگ سېسى و کبچە و کوندوز اوروش ایچیدە بۆلگنی مېنینگ فکر و خیالیمدن اونى اییرگن می؟ دېب آق بیلک اۆزی دن سۆرەیدی و ینە اۆزیگە تسلى بېرگن دېک قیلیب ایتە دی:

-یۇق، یۇق، تېمورجان قنچە هم اوروشلر بیلن بند بۆلسە،

مېنینگ خیالیمدن اوزاق بۆلە آلمەیدی. کوندوز مېنى اویلالمسە، کبچە لر

حتما اويقوسىدە مېنى كۆرەدى و يۈرەگى مېن و اۋغلى اوچون قتيق راق اورەدى.

الگاچ دە ياتگن كيچيك باله قيميرليدى و اق بيلك خيال لريدن آيريليپ، يۈگۈريب الگاچ نى تېرەتەدى. باله، آنە سىنى ايسى دن تانيپ، ايشانچ بيلن كوليمسيرەدى و ينە ياتيپ قالەدى. اق بيلك نينگ يۈرەگى يخشى تويغولر گە تۇليپ، اوۋغىلچە سىنى استە اۋپەدى و اونينگ يۈزيگە قرەب تېمور نى كۈرگن دېك بۇلە دى.

- مونچە آتە سىگە اۋخشەيدى! تېمورجان كۈرسە، قنچە سېوينىپ قالسە كېرەك! خدا بيلەدى كە تېمورجان قچان رخصت آليپ كېلەدى. رخصت آلالمسە، ترخيىص بۇليشى گە قنچە كۇپ آى و كون قالگن! اونگە چە باله گىنم قدم قۇيەديگان بۇلەدى، دېب اق بيلك اۋغلىنى ينە بير اۋيىپ قۇيەدى و اونى، چاپىب تېمورجان نينگ بۇينيگە آسيلگن حالت دە تصور قيلەدى.

شو پيت دە اق بيلك دريچە سارى قرەب، بير آدم نينگ بارليگىنى كۈريب، موزدېك ساوقليىك بدننى تيترەتدى و قۇرقوو دن سېسىنى چيقەرالمەدى. دريچە آرتيدە تورگن كيشى:

- اق بيلك جان، قۇرقمىگ! مېنى تانيمەدينگىز مى؟ دېب، بير سكرەب، دريچە دن آشىپ، اويگە كيردى و اۋزىدن كېتە ياتگن اق بيلك نى قوچاغىگە آليپ، باشىدن بۇينى گچە و بۇينىدن باشى گچە قىتە - قىتە اۋيىپ، قوچاغىگە قيسدى.

اق بيلك نينگ كۈزلىرى ياشدن تۇليپ، يۈرەگى سېوينچ دن قتيق - قتيق اورىپ، تيتراق آواز بيلن:

- تېمورجان... تېمورجان... سىزنى ھەم كۆرر كۈنىم بار اېكەن،  
دېدى و قلىتەرب يىقلەياتگەن دېك بۇلىپ، تېمور نىنگ بۇنىگە قۇل  
لرىنى حلقە قىلىپ آسىلدى.

تېمور، آق بىلك نى قۇل اوستىگە كۈتەرىپ، كۆزلىرى دن اۇيىپ،  
ياشى نىنگ شورلىگىنى تاتدى.

-آق بىلك جان، سېوگلىم، كۈزىنگىز نى آچىپ، مېنگە قرەنگ!  
قنچە پىادە يۇل يورىپ، سىز نى كۈرىش اوچون كېلگەن مەن. جان گىنەم  
ھوش گە كېلىنگ...يىغلەمىگ، دېدى و آق بىلك نى سېكىن گىنە  
كۈرپچە اوستىگە قۇيدى.

آق بىلك اۋرىدىن توريپ اۋلتىردى، كۆزلىرىنى تېمورگە قرەتىپ،  
يۈمىپ، آچدى. كۈزىياشى يۈپقە پردە دېك بۇلىپ كۈزى نىنگ آلدىنى  
آلدى و تېمورنى يىخشى كۈرالمەدى. ناچار قۇلى بىلەن ياش لرىنى ارتىپ،  
كۆزلىرىنى كتە راق آچىپ، تېمورگە تېرمولدى. تېمور، اونگە شۇخ -شۇخ  
كۆزلىرى بىلەن كولىپ قىردى. آق بىلك كۈزىنى يېرگە تىكىپ، باشىنى  
تېمورنىنگ اېلكە سىگە قۇيدى.

آق بىلك، قنچە كېچە لر تېمور بىلەن كۈرسە، نىمە گپ لر  
ايتىشىنى، اونى قندەى استىقبال قىلىشىنى اۋز آلدىدە تصور قىلگەن اېدى،  
مگر حاضر تىلى گپ دن قالىپ، نىمە دېگىنى و نىمە قىلگىنىنى بىلمەدى.  
بىر- بىرلىرىدن اوزاق توشگەن و بىر كۈرماققە ايتتىق بۇلىپ يۈرگەن بو ايكى  
عاشق، اېندى بو كۈتلىمەگەن دىدار چاغىدە سېوينچ و يىخشى توغولر  
ھجومىدىن، سۈزلالمەى، كېچە نىنگ جىم - جىرىت لىگىگە قۇشىلىپ  
قالدىلر.

بو ايكي سېۋىشگنلر يۈرەگىدە بىردېك احساس اويغاندى. يۈرەك لرى قووانچ دن قتيق راق و تېزراق اورە باشلەدى. تېمور، كۆزى نى يوميپ، باشىنى اونىنگ كۆكسى گە قۇيگن و بدننى الاو دېك يانيپ تورگن آق بىلك گە قرەب، اۋريلگن اوزون ساچى دن سېكىن گىنە تارتىپ، آق بىلك نى اۋزىگە ياووق راق قىلىپ، كۆكسىگە مەربان راق قىسىدى. آق بىلك يەنە سېۋىگى و قووانچ، وصال و بخت دن ياروق يولدوز دېك جالابىرىپ تورگن كۆزلىرى يىلن تېمورگە قرەب، اۋتگن يىل لر و آى لر خاطرە لرىنى اونى كولىپ قرەباتگن كۆزلىرىدن اۋقىدى.

آق بىلك، كىچىك ليگى دە تېمور بىلن بىرگە بى-بى آتىن ليك قىلىپ محلە نىنگ كتە - كىچىك قىز - بالە لرىگە سباق بېرىپ يورگن، تېمور نىنگ آنە سى يانىدە سبق اۋقور اېدى. اۋشە چاغلردە تېمور، اونگە سبق ايتىپ، بىلمەگن و اۋرگنمەگنى دە اوزون - اوزون اۋريلگن ساچى دن تارتىپ، سبق اۋرگەتر اېدى. نېچە يىل دن سۇنگ آق بىلك خانەگى ملا نى بىتتىرىپ، اوى گە اۋلتىردى و تېمور نىنگ اويىدن آياغى يىغىلدى. شو يىل لر دوامىدە كىچىك ليكدەگى بېغار دۇستلىك، يىگىت ليك اىلىق اىستك لرى و ھىجانلى تويغولرى بىلن قۇشىلىپ، كون سە- يىن آرتىپ، بىر النگە لى، كوچلى سېۋىگى گە اۋزگەرىپ قالدى.

آق بىلك، ھەر كون تانگ آتىشى دن اىلگىرى و ھەر آقشام قرانغولىك يايىلىشى دن آلدىن راق اۋت اۋرماق بھانە سى دە باغ اېتەگى گە بارىپ، تېمور گە كۆز توتر اېدى. تېمور ھم سبق اۋقىش يا اۋت اۋرىش نى بھانە قىلىپ، آق بىلك نىنگ دىدارى اوچون باغ گە اۋتىپ، پست ليگى تۈزە بۇيىچە بۇلگن دېوار آرقە سىدن آق بىلك گە قرەب ياشورون بىرار گپ آيتىپ، بىرار وقت قرانغولىكدن فايدەلىنىپ، دېوار دن

سكرەب، آق بىلك نى توتماقچى بۇلر ابدى. آق بىلك رسوالىكدن قۇرقىب، يورەگى بۇلمسە ھم قاچىب، باغ دن اوى گە قىتر ابدى.

تېمور بىلن آق بىلك، قۇشنى بۇلسە لر ھم، كىچىك لىكدن بىر- بىرلىرى بىلن اۋقىب، بىر- بىرلىرىنى كۇرىب، يشەگن بۇلسە لر ھم، آتە- آنە لرى، آپە- سىنگىل لرى و آغە - اينى لرى بارىب كېلسە لر ھم، اۋز ارەلریدەگى انگەلى سېوگى اوچون باشقە لردن اويالىب، بىر- بىر لرى نىنگ اوى لرىگە بارىب كېلمس ابدى لر. آق بىلك، بى- بى آتىنى دن، تېمور ھم آق بىلك نىنگ آتە سى دن قاچىب، كۇز مە كۇز بۇلىشنى ايستەمس ابدى.

تېمور، ھر آقشام يورەگىمدەگى گپ نى شو كېچە آنەم گە آيتىب، اونى ساوچىلىككە يىبارە من، دېب عھد قىلر ابدى، اما كېچە آنە سى دن اويالىب، آيتەدىگان گپى تىلى گە كېلمەى، ايم و سىم بۇلىب، نان دن كېين اۋز تامى گە كىرىب، كېچە نىنگ يىرىمى گچە شىرىن خياللر بىلن اۋىنب، آق بىلك بىلن سۇزلىشىب، اونىنگ اوزون - اوزون قرا ساچ لرى، حيا دن آلاو دېك قىزرگن يوزى و سېوگى دن تۇلە كۇزلرىنى اۋىلب، اويقوگە كېتر ابدى. اويقوسىدە ھم آق بىلك يانیدە ياتگن دېك، اونىنگ قىزىل گل دېك ھىدى نى ايسكەگن دېك و بدنى نىنگ فارم ايسىغ ليغىنى حس قىلگن دېك بۇلىب، اېرتەسى شىرىن تويغولر و اېزگو ارمان لر بىلن اويغانىب، آق بىلك گە تونگى شىرىن خيال لرىنى، كۇرگن سۇلىم توش لرىنى ايتماق اوچون باغ اېتەگى گە بارر ابدى.

آق بىلك ھم ھر كېچە يولدوز لرگە قرەب، اېنگ ياختى و جلا بېرەدىگان يولدوز نى اختەرىب، اونى تېمور نىنگ شۇخ - شۇخ كۇزلرى گە اۋخشەتىب، آى لب لرىدن، تېمور نىنگ سۇزلرى و پىغام لرىنى

اېشېتىپ، ساغىنچ لرى و بېقرار تلپىنىش لرى بىلن اويقوسىنى بوزگن يۈرەگى گە قۇلاق توتىپ، آخرى چرچىپ، اويقوگە كېتىپ اېدى.

يولدوزسىز كېچە لردە ھەم تېمور نىنگ اۋىناقى كۈزلىرى، اق بىلىك نىنگ كۈز اۋىنىگىدە اۋىنىپ تورر اېدى، لېكىن تېمور اۋىنىنگ تويغۇلرى حەقىدە سۈرەپ قالسە، اۋى قىچە اۋزى گە ياۋۇق بىلسەھەم، اۋى قىچە سېۋىپ، وصالىنى آرزو قىلسە ھەم، حيا دن كۈزىنى يېرگە تىكىپ، گېيرالمەي، فقط تېمور نىنگ سۈزلىرىگە قۇلاق توتىپ تورر اېدى.

بىر اقشام تېمور دېۋار دن سكرەپ، اق بىلىك تامانىگە اۋتدى. اق بىلىك قاچماقچى بۇلدى، اما تېمور اۋىنىنگ ايككى اوزون اۋرىلگن ساجى دن توتىپ تارتدى و اق بىلىك قاچالمەي، ناچار تاختىپ قالدى. تېمور اېندى اق بىلىك نى قوچاقلب آلەمن دېگىنىدە، آنە سى بى بى آتىن نى كۈرىپ، بىردن قاتىپ قالدى. اق بىلىك بىر سىلىكىش بىلن اۋزىنى تېمور دن اۋزىپ، اۋىگە قرەپ چاپدى و اۋشە كېچە، اېرتە گچە ياتالمەي، ايلان دېك تۇلغەنىپ چىقدى.

اېرتە سى، بى بى آتىن قىلمە - سىنۋسە لرى پىشىرىپ، اوچ، تۇرت يىسنگن خاتىن - قىزلر بىلن ساۋچىلىككە كېلدى و ايككى كۈن دن كېين اق بىلىك نى تېمور گە فاتحە اۋقىپ، اۋىشتىرىپ، بىر آى دن سۈنگ نكاح اۋقىتىپ، تۋى قىلدى لرى.

اق بىلىك و تېمور اوچ آى نى اۋىتىلمىس، تىكرارلىنىس شىرىن رۇيا و خياللر بېشىتىدە اۋىتكزدى لرى. كېچە نى كۈندۈز دن تانىمەي، ساعت و دىققە لرى اۋىتگىنىنى بىلمەي، اۋز دىيالرىدە غرق بۇلىپ، اۋزلىرى دن باشقە ھېچ كىم و ھېچ نرسە نى كۈرمەي يۈردىلر.

اۋچ آی بو ایککی وصال گه یتیشگن عاشق لرگه جدا تېز، بیر  
کۆز یومیب آچگونچه اۋتدی و بیر کون تېمور نی عسکرلیککه  
چقیریلگنینی و بیر- بیرلردن ایریلیب، اوزاق لشیب قالگن لرینی بیلمه  
قالدیلر.

تېمور، تۇقوز آی دن بېرى اوروش میدانیده، اۋق یامغیری و  
النگه لی اۋت ایچیده، قنچه خطر لر و دهشت لی حادثه لرنی باشیدن  
اۋتکه زیب، بیرار وقت اوروش قیناق توس آلیب، اۋق یامغیری و تینیم  
سیر آتیشمه لر شاوقینی باش کۋته ریش و بیر لحظه دم آلیش امکانینی  
بېرمه گنده، آق بیلک نی اېسلب، بیر کۋریشنی و او بیلن وداع لشیشنی  
آرزو قیلگن اېدی.

منه، اېندی بو آرزو روی آب گه چیقیب، آق بیلک بیلن بیرگه  
اۋلتیریب، اونینگ یاقیملی سېسینی اېشیتیپ، اونینگ قۋینیده برچه  
کۋرگن دهشتلی واقعه لر و تارتگن عذاب - مشقت لر، چېککن حسرت -  
قیغولرنی اېسی دن چیقهریب، دۋزخ اۋتیدن قوتیلیب، سېوگی بهشتیده  
دور سورماقده اېدی.

آق بیلک و تېمور، اۋتگن شیرین خاطره لر و تۇقوز آی تارتگن  
قیغولر نی بیر- بیر، کۋز آلدلردن اۋتکه زیب، حاضرگی دیدار دن  
سېوینیپ ، مشتاق لیک بیلن بیر - بېریگه قره ب، لب لریده سعادت  
غنچه سی گلله دی، کۋز لری ایککی دېنگیز دېک مهر تۇلقونی دن  
تۇلغاندی و ایککی قاراسیز یوره ک ایککی قنات چیقرگن کفتر دېک  
کۋکس لرینی ایرتیب، اوچماقچی بۇلدى.

بىر - اىكى ساعىتىدىن كېيىن كىچىك بالە، الگاچ اىچىدە قىمىرلەدى ۋە يىغى گە اۋخشىش تاۋۋشى اق بىلىك ۋە تېمورىنى اوزون - اوزاق خىرسىزلىك دىنا سىدىن چىقەرىپ، چىن حىيات عالمىگە قىتردى. تېمورى اېندى گىنە بالە سى نىنگ بارلىگىنى سېزگىدىن اويالىپ، اق بىلىك دىن اىلگىرى راق يۈگۈرىپ، الگاچ گە قرەدى ۋە شىرىن بالە نى قوچاغىگە آلىپ، كىچىك گىنە قۇل لرى ۋە كېنگ پېشانە سىدىن اۋپدى. كىچىك بالە ناتىش كىشى نىنگ ايسىنى سېزگن دېك بۇلىپ، تېمورگە اۋخشە گن اىككى قرا كۆز لرىنى آچىپ -يۈمدى ۋە لب لرى بورىلىپ، يىغلە ماقچى بۇلدى.

اق بىلىك بالە نى اۋز قوچاغىگە آلىپ، باشىنى سىلب، سوت بېرگن دىن كېيىن، اويقوگە كېتىن بالە نى الگاچ گە ياتقىزدى. تېمور، آتە لىك مېرىنى اېندى گىنە تانىپ، كۆزىنى بالە دىن اوزالمەي، ھەر قىچە كۇپراق اونگە قرەسە، اوشىچە لىك اۋزىگە اۋخشە - گىنىنى كۇرىپ يۈرەگى سېۋىنچ ۋە سېۋىگى گە تۇلر اېدى. اق بىلىك گە قرەپ پىست تاۋۋش يىلن سۇرەدى:

-نامەنگىزدە بالە مىز نىنگ نامىنى يازمەگن اېدىنگىز. آتىنى نىمە قۇيگن سىزلر؟

-بىبى آتىنىم، بابرجان دېدى لىر. مېن، اونى سىزگە اۋخشە گنى اوچون، ھەمدە سىز نى ھەر لحظە اېسلەتىپ تورسىن، دېب اۋزىمچە تېمورجان دېمىن.

-بابر كۇپ يىخشى آت. قنى اېدى، اۋغلىمىز ھەم بابرشاه دېك بىر اتاقلى شاعر بۇلسە! موندن بويان نامەلرىنگىزدە بابرىمىز حقىدە كۇپراق يازىنگ.

آق بیلک بو گپ لردن اوزاقلیک لرنی اېسلېب، تېمور گه تېلمورېب قالدی. يوره گي بۇلر- بۇلمس سۇره دى؟

-نېچه كونلیک رخصت آلیب کېلیب سیز؟

رخصت آلگنیم یۇق. فرقه میزگه، قۇشنى شهرده بوزغونچى لر ییغیلگن، دېگن خبر کېلدى. شهریمیز یاووغیدن اۇته یاتگنیمیزده سیزنى، آته، آنهم نى اېسلېب، کۇرمه ی اۇتگیم کېلمه دى. اۇرتاق لریم دن، یۇقلیگیم نى بیلدیرمسلیک لرنی سۇره ب، قاچېب کېلدىم. ایكى -اۇچ كون دن کېین اولر قېتیب کېلگونچه مېن هم یتیب باره من.

قوماندانیگیز بیلېب قالسه، قنده ی بۇله دى؟

اۇرتاق لریم خبر تاپگنى قۇیمه ی میز، دېب وعده بېرگن لر.

آق بیلک بو گپ نى اېشیتیب، همه بدن تیتره ب، موزلب قالدى. باتور محبوبى، اۇرتاق لرنی خطر ده یكّه قۇیب، اونینگ یاردمى گه كۇز توتیب امید باغله گن اېل - اولوس نى كۇزگه ایلمه ی، قاچېب کېلگن اېکن-ده! بو شرمنده لیکنی اۇز سینگلى، دوگانه لرى، اونینگ بختیگه رشك قیلیب یورگن قیز لر دن قنده ی یاشیراله دى؟ آخر یازنه سى قیرق كونلیک کېلین نى تشلب، عسکرلیککه کېتگن اېمس مى؟ او، نیمه اوچون شونده ی قاچېب کېلمه دى؟ اونگه سېویکلى خاتینى قدرلى اېمس مى؟ تېمورجان بیلن بیرگه - حتى كه آلدین راق کېتگن ییگیت لر نینگ بیرار ته سى هم بونده ی قاچېب کېلمه گن-كو! اېرته اولر تېمورجان نى كۇریب، قاچگننى بیلېب قالسه لر، قنده ی بۇله دى؟

بو یامان اوۋى- خیال لر و باشیگه یاغیشى ممکن بۇلگن اېرتنگى طعنه لر تصورى، آق بیلککه شونچه لیک آغیر كۇریندى كه، تېمورجان نى ایستر- ایسته مس، شو کېچه نینگ اۇزیده قیتهریب بیباریش گه عهد

قىلدى، اما جانىدىن ھەم عزىزراق بۇلگەن و اونىڭ ساغىنچى و مەھرى گە چىققاق بۇلىپ، اوزاق يۇلنى باسىپ كېلگەن بو وفالى دلدارىنى قندەي قىلىپ كۈندىرىش نى اۋىلىپ، آخرى سۆزلەي باشلەدى:

-تېمورجان، نېچە آي آلدین شەھرىمىز گە بوزغونچى لىر كىرىپ، مال و آلىمىز نى تاراج قىلىپ، يىگىت لىرنى اۋلدىردىلر. اگر باتور عسكىر لىر ياردىمىمىز گە كېلمەگەن بۇلسە اېدىلر، خدا بىلەدى مېن، بالەنگىز، آتە و آنەنگىز قنچە مشقت تارتىپ، قىسى شەھەرلەرگە آوارە بۇلر اېدىك. حاضر باشقە بىر شەھەر نىڭ اېل - اولوسى شو بلاگە اوچرەگەندە، سىز مېنىڭ يانىمگە قاچىپ كېلىپ، اورتاق لىرىنگىز نى يىككە قۇيىپ سىز! اېرتە جواب بېرالە سىز مى؟

-سزام شو! مېن سىز نى كۈرەي دېپ كېلدىم. مېنى كۈرگىمىز دىن سېۋىنەسىز، دېپ اۋىلەگەن اېدىم. اگر مونداق لىگىنى بىلىم اېدى، تىرخىص بۇلگىمىز چە كېلمىس اېدىم.

- تېمورجان، بو راست. مېن سىز اوچون دعا قىلىپ، اېرتە لېگچە ياتمەگەن كېچەلرېم آز اېمىس، سىزنى يوخلىب دېۋانە لىردېك اۋز باشىمگە گىپىرىپ يىغلەگەن كۈنلرېم ھەم كۇپ. نىمە اوچون احساسىم نى بىلمەي سىز؟ مېن سىزنى كۈرىپ، سېۋىنچ دىن يۈرەگىم كۈكسىم نى يىرتگەن دېك بۇلدى. قىتە دىن تىرىلدىم، بخت و سعادىتىم نى، آرزو و ارمان لىرىم نى قۇل گە كېلتىردىم، اما مونداق كېلگەننىڭىز نى تىلەگەن اېمىس اېدىم. بو دىدار اېمىس، شىرمەندە لىك!

تېمور بو سۆزلەرنى اېشىتىپ، اچىنىپ كېتىدى. بىر تورلى قىغو و پشيمانلىك يۈرەگىنى مىجىغلەدى. اينىچىپ، اق بىلىك گە قىرەپ، يەنە

ھەم ملامەت قىلماقچى بۇلدى، اما اونىڭ كۆزى ياش لرى و علاج سىز  
 ھالىتى نى كۆرىپ، آرتىقچە ملامەت قىلىش گە تىلى بارمەدى.

آق بىلىك ايكى تمانلمە عذاب چېكىردى. ھەم تېمورجاندىن  
 ايرىلگىسى كېلمەس اېدى و ھەم اونى سىقلشنى كەتە بىر نىڭ، چېكىسىز  
 شەرمندە لىك دېب بىلەر اېدى. شو ايككى تمانلمە عذاب كۆزىدىن ياش  
 آقىزىدىرىپ، اونى اېزىلىپ يىغلىش گە مجبور قىلدى.

آق بىلىك ياش دىن تۆلە كۆزلىرىنى تېمور گە تىكىپ  
 تىتراق تاۋۇش بىلەن ايتدى:

- تېمورجان ھەر قنچە مېنى ملامەت قىلسىڭىز، ھەقىقىي بار. خدا  
 قىلمەسەن سىز ھەم مېن كۆرگەن كۈن لرنى كۆرىپ، مېنىڭ باشىمدىن  
 اۋتگەن دەشتلى ھادئە لردىن خەبەر تاپكەن بۇلسىڭىز اېدى، مېنگە ھەق بېرەر  
 اېدىڭىز!

تېمور، اۋشە رەنجىگەن سېس بىلەن اچىنىپ سۆرەدى:

- قنى؟! باشىڭىزدىن اۋتگەن ۋاقىتە لرنى، كۆرگەن قىيىن كۈن  
 لرىڭىزنى، مېندېك بىلمەگەن و كۆرمەگەن كىشىگە ايتىپ بېرىڭ!  
 آق بىلىك زارلىنىپ، ياش تۈكىپ، تاثيرلى بۇغىق آواز بىلەن،  
 بوزغونچىلەر نىڭ ھەجومىدىن ھەكايە قىلە باشلەدى. اۋتگەن دەشتلى كۈن  
 لرنى و كۆرگەن قۇرقىنچىلى ھادئە لرنى، نەرت و يىغى سىگە قۇشىپ  
 شۇندەى استادلىك بىلەن گۆدە لىتىردى كە تېمور اۋزى دىن ايرىلىپ،  
 ھەكايە گە مەھۇبۇل، اۋشە قىيىق كۈنلرنى، اۋشە قانلى ھادئە لرنى اۋز  
 كۆزى بىلەن كۆرگەن دېك بۇلدى.

آق بىلىك ھەكايە سىنى توگەتەپ، جىم بۇلگەن بۇلسە ھەم، تېمور  
 اۋشە نەرتلى ھادئە لەر گەردابىگە غرق بۇلۇپ، مەسجىد اچىدە آخۇند بىلەن

ملا امام قانگە بولۇپ ياتىدى، خاتىن - قىزىل يىغلى، باش - آياغى تانىمەي، يىشىندىگان جايىنى اخترگىنى، آغىز - بورىنىنى اۋرەگى، مىلتىغ - يراقلى بىر كىشى تېمورىنىنگ آتە سىنى باش يىلگى سودرەتەي، انبار تمانگە آلىب بارگىنى، آق بىلىك نىنگ رىنگ - روىى آپپاق اوچىپ، بالە سىنى قوچاغىگە باسىپ، بىر پەنە جايدە ياشىنگىنى و تال بىرگىدېك قىلىپەگىنى، اوى لىر اچىدىن كىچىك بالە لىر ايز - چوۋ قىلىپ، تشقىرىگە و تشقىرىدىن اويگە قرەب قاچىگىنى، نېچە مىلتىغ - يراقلى كىشى اويدىن يىنگى كىيىم لىر، تلوزىيون، رادىو، قالىن، گلىم، كۆرپە، ياستىققە اۋخىشىش قىمتلى نىرسە لىرنى چىقارىپ، ايكى - اوچ ارابە گە آرتىگىنى، ساجى اوزون، قارە يوزلى بىر كىشى قارە - قارە كولىپ، بىر گوزەل قىزنى اېلىكە گە كۆتەرىپ، آت گە مىندىرگىنى و قىز: آنە جان، آتە جان، مېنى قوتقەرىنگ، دېب چىرىللەگىنى، بىر ياقدە قوروق سمان انبارىدىن توتون و النگە آسمانگە چىققىنى و ھەر تماندىن آتلىر نىنگ چاپىگىنى - اۋق آتلىگىنى و خاتىنلەر و بالەلرنىنگ يىغى - سىغى سىنى كۆز اۋنىگىدە، شو لحظە، چىندىن ھەم يوز بېرە ياتىگىن دېك كۆردى و اېشىتىدى.

تېمور بو دەشتلى صحنە لىرنىنگ تصورىدە اۋزىدىن اجرەلىپ، قىسى بېردە لىگىنى بىلمەي قالدى.

آق بىلىك، ياشلى كۆزلىرىنى تېمور گە تىكىپ، پرىشان حالىنى پىشانە سىدىن آققىن تامچى تېرلىرىدىن بىلىپ، يورەگى مېھرى و شىقتىن دىن تۈلدى و تېمورنى سېكىن سىلىكىتىپ، اۋزىگە كېلىتىردى.

تېمور بىر يىمان توش كۆرگىن دېك اوچىپ توشىدى و آق بىلىك نىنگ مېھرى تۈلە كۆزلىرىگە قرەپ، اۋزىگە كېلىدى. قىلگىن اېشىگە، بو ايش نىنگ عاقبتىنى اۋىلىپ، ملايم تاۋوش بىلىن:

- بو محبتلی کۆزلر یاش تۆکیش اوچون یره تیلمه گن. آق بیلک جان، بس قیلینگ! سیزنی همه احساسینگیز بیلن، قیغولر و ارمان لرینگیز بیلن، شهامت و جان کۆبرلیگینگیز بیلن قیته دن تانیب آلدیم. اگر تیریک قالسم، سیزنی، بابر جان نی، ابل - اولوسیم نی و اوزیم نی شرمندە لیکن قوتقهریب، قصاص آلرمن. حاضر اؤز فرقه م گه قیته من و بشقه کؤریشیمیز یا رخصت آلگنیم دن یا ترخیص بؤلگنیم دن سؤنگ، دبدی و آق بیلک بهرگن گل لی آق رۇمالی بیلن اونینگ کؤز یاشینی اریتیپ، آق بیلک نی قوچاقلب، اؤرنیدن توردی.

آق بیلک زارلنپ، تېمورگه چیرماشدی و ینه ییغلی باشلەدی. تېمور الکاج گه اېگیلیب، باله سینی نېچه قتله مهربانلیک بیلن اویپ، ایسکه دی. کیچکینه بابر اویقوسیده بو صداقتلی سېوگی نی حس قیلگندېک بۇلدی و قیزیل لب لری تبسم دن گلدېک آچیلیب، یومیلدی. تېمور، ینه بیر بار آق بیلک نی قوچاقلب، کۆزلریدن و دایم سېویب کېلگن قاره اوزون ساجیدن تیز- تېز اویپ، بیر سکرهش ده دېره زه دن آشیب، باغ دېواریگه تارماشیب چیقدی و آق بیلککه قه- یریلیب، پست تاووش بیلن: «ینه کؤریشگونچه، خدا یارینگیز بۇلسین» دبدی و کؤچه گه سکره دی. او، کؤچه دن کؤچه گه اؤتیپ شهردن چیقدی. شونده، آرقه سیگه، سېویملی جفت حاللی و پاک سېوگیسی نشانه سی ججی اۇغلی، اونینگ یۇلیگه دایم کؤز تکیب، یشه یاتگن شهریکه قره ب تاخته دی.

شهری، باغی و آق بیلک بیلن بابر اونده حیات کېچیره یاتگن حویلی سی پارلب چیقّه یاتگن قویاش یاغدوسیگه چۇمیلگن اېدی.

تېمور، آق بېلىك اۈنى كۆرە ياتگن دېك، تېسىم قىلىپ، اۈنىنگ  
 چېۋرلىك بېلىن گل تىكىپ، اېسىدەلىك و مېھرى رمزى صفتىدە ساۋغە  
 بېرگن آق رومالىنى نېچە قتله وداع رسمىگە كۆتردى و كۈن چىقر  
 تمانگە، اۇرتاق لرى و فرقه سى تامانگە محكم ادىم لر تشلب، يۇل گە  
 چىقدى . . .

قوتيليش

جیران، كۆزینی قینه لیب آچیب، اطرافیگه نظر تشله دی. بیرینچی قرهش ده قرانغولیکدن تشقری هېچ بیر نرسه كۆزیگه كۆرینه - دی، کبین راق اېسه، استه - سېکین كۆزی آلدیده گی قرا پرده كۆتەرلیب، اویده گی نرسه لر خیره راق بۆلسه ده، كۆرینه باشله دی. او، اۆزینی هېچ بیر نرسه تۆشلمه گن قوروق بیر منجه اوستیده یاتگنینی بیلیب، یخشیراق تیکیلیب، یان - اطرافیگه قره دی. قرانغولیککه باتگن بو اوی ایچیده شو قوروق منجه دن تشقری، هېچ بیر نرسه، حتا که بیرار پرده یا فرش یۇقلیگی و تۇرت تامانیده هېچ بیر کیمسه نینگ كۆرینه گنی و بیرار تاووش نینگ اېشیتیلمه گنی اونى حیران قیلدی. بو حقیرانه جای اونگه ناتیش اېدی.

او، اویشیب، آغیر بۇلگن قۇللارینی زحمت بیلن کۈتەریب، کۈزلری، باشی و بوتون وجودینی سیپەلەب، اۋز حال - احوالینی بیلماقچی بۇلدى. قۇلى باشیگە ييتیشگچ، بوتون وجودی درد گە تۇلدى. باشی یاریلیب، قانى بۇینى گچە آقیب، قوروب قالگن ابدی. کۈزلری شیشدن یومیلیب، کیپرک لری بیر - بیرگە یاپیشیب، آچیلگندە سنجیب کبتردی.

جیران، اېس - هوشینی ییغیب، باشیدن اۋتگن واقعه لرنی اېسلش گە اوریندی. اول هېچ نرسە، حتا که اۋز آتی و کیملیگی نی هم اېسلالمە ی، «خاطرە م نی اونوتیب من می؟» دېگن فکر اونى لرزه گە سالدی، اما بیر نېچە دقیقە دن سۇنگ برچە آلیس و یقین واقعه لرنی بیرین - کبتین اېسلە ی باشلەدی.

او هر آقشام دېک بو آقشام هم مکتبده قالیب، اوپوشمە ایش لرنی بجەریب، اعضاء نینگ هر بېرىسى گە اېرتە گە قىلىنىشى كېرەك بۇلگن ایشلرنی توشونتیریب، كېچقورون مکتبدن چىقىپ، اویى تامان يۇل آلدی. بو آقشام نېگە دير، خاطرى پرىشان و كۈنگلى ناتىنچ بۇلیب، باشیده یامان خیال لر ایله نردی. اونینگ آلتینچی سېزگی سی مشئوم بیر واقعه یوز بېرىشىنى آلدین دن سېزىب، يوره گىنى نامعلوم بیر قۇرقوو قاپلب آلگن اېدى.

بوندىن بیر آی یا که قىرق كون آلدین شو يۇلدە، شونداق بیر كېچقورون ليكدە قرا سللە اۋرەگن و مللە تون كيىگن ايکكى كيشی تۇست دن يۇلىنى تۇسىب، بېرىسى اونینگ بىلك لرىدن اوشلب، ايکینچىسى قۇرقىنچلى، اما پستراق تاووش بیلن: «اگر موندن كېين مکتب گە بارسنگ، جانینگدن قۇلىنگنى يوو» دېب، تۇینى آچیب،

بېلباغىگە آسىلگن مىلتىغىنى كۆرسەتەتتى، بىر زوم دە غايىب بۇلگن اېدى. اولر شونداق تېز تاپىلىپ، غايىب بۇلگن اېدىلر كە جىران نىمە قىلىشى نى بىلالمەي، حتا كە بىراو نى ياردەم گە ھەم چقىرالماي تاختەگن جايىدە قاتىب قالگن اېدى.

جىران بو واقە نى مەكتەپ ادارەسى و پولیس گە خەبەر بەردى. اولر بىر ھەفتە - اۋن كۈن سېزدىرمەي اوزاقدن اۋنى قوروقلەيدىلر، اما ھېچ بىر شېھەلى ھەركەت ھېچ ياقىدىن كۆرىنمەگنى اوچۇن بو واقە نى ھەم جىران و ھەم امنىتى ارگانلر جەدى بىلمەي، اونوتگن اېدى لر. جىران، بو آقشام اۋز اۋزىدىن پرىشان بۇلىپ، تورلى - تورلى فەكرلر و واھمەلر بىلەن، حۈيلى سىگە كىردى.

آتەسى ھەر آقشام ياقىلگن اريكىن نى كۈتەرىپ، تەشقى حۈيلى اېشىگى يانيدە تۈرىپ، اونىنگ كېلىشىنى كۈتەردى. بو آقشام اتەسى نىنگ پىشۋاز چىقمەگنى، يەنە ھەم اۋنى پرىشان راق قىلدى، اما يۈلدە ھەم، حۈيلى دە ھەم ھېچ بىر شېھەلى نەرسە كۆرىنمەيدى. شونىنگ اوچۇن خەتەرلىك بىلەن اۋى اېشىگىنى آچىپ، اچكىرى گە قەدەم قۇيدى. اۋىگە كىرگەچ، چەراغ يارۇغىدە قانگە بۇيەلىپ ياتگن اتەسىنى كۆردى. اېندى شەۋقىن كۈتەرىپ، قۇشنىلرنى ياردەمگە چىقىرماقچى بۇلگنىدە، آرقەدن بىر آغىر نەرسە باشى گە قەتتىق اورىلدى و ھوشىدىن كېتىپ، بېھال يېرگە يىقىلدى.

اۋ، اۋىدىن بو يېرگە قەدەم كېلىپ بېرىلگنى و بوساۋۇق اۋىدە نېچە سەئەتەن بېرى ھوش سىز ياتگنىنى بىلمەس اېدى. چەقۇلىنى كۈتەرىپ، سەئەت گە قەرەب، ۋەقت نى بىلمەقچى بۇلدى، اما قۇلىدە سەئەت نىنگ يۇقلىگى اۋنى بو يېرگە آلىپ كېلگن كىشىلر تامانىدىن

یېچیب آلتینگیدن دلالت بېردی. جیران اۋرئیدن توریب، اۋلتیردی و آیاغ، قۇل لرینی قیمیرلیتب، ساغ - سلامت اېکن لیگیگه ایشانچ حاصل قیلدی. ایشانچ حاصل قیلگچ، قوتیلیش یۇل لرینی ایزلب، خیال دېنگیزگه چۆکیب کېتدی.

شو وقتده گپ لشیب کبله یاتگن ایککی آدم نینگ تاووشی، جیران نینگ قۇلاغیگه چلیندی. بیرسی نینگ سېسی اۋشه آقشام اونینگ یۇلینی تۇسیب، تھدید قیلگن آدم نینگ سېسیگه اۋخسردی. جیران، قەیرگه کېلتیریلگنینی، و قندهی کیشیلر نینگ قۇلیگه توشگنینی بیلیب، بوتون وجودی تیرە ی باشلەدی. درحال منجه اوستیگه چۆزیلیب یاتدی و کۆزلرینی یومیب، اۋزینی حالی هم هوشگه کېلمەگن دېک قیلیب کۆرستدی.

اوی اېشیگی آچیلدی. بیر کیشی منجه گە یقینلشیدی. جیران اونینگ نفسینی اۋز یوزیده حس قیلدی. کېین بیر قۇل اونی قیمیرلیتب، یوزیگه بیر - ایککی بار استە - استە اوردی. جیران، نفس تارتمە ی، آواز چیقرمە ی قیمیرلمە ی یاتدی. اۋشه تانیس سېس تعجب لنگن حالده اۋز همراهیگه ایتدی:

- آبا! بو قیز حالی هم هوشیگه کېلمبدی، کو! قۇلینگ مونچه آغیر اېکن، استە راق اورسنگ بۇلمس میدی؟

- پروا قیلمه، اۋلمەیدی. بو لرنی جانى قتیق. یور، پھرە میزگه کېتە یلیک! بیران گپ بۇلسە، قرەخان بیز نی تیریکلەیین پوست لیدی.

- راستینی ایتسم، شو قرەخانینگ دن یمانیم کېلیدی. قۇلیم یېتسە، باشینی کھسیب تشلەیمن. اۋزی هرکېچە توتیب کېلتیریلگن بېچارە قیزلر نی زۇرلب، ناموس لریگه تېگیب، اېرتە گچە عیش -

عشرت قىلەدى، قالگن لرى بېچارە مردم گە جور قىلىپ، اولردن تارتىپ  
الگن پول لرى بىلەن قمار اۋىنەيدىلەر. مېن و سېن ھەم نېچى تە اۋغرىنى  
اسرەيمىز، دېب خوش مىز.

- گپ لرىنگ حق. شامدىن يېرىم تۈنگە چە قمار اۋىنە، بىر-  
بىرلەرنى سۈكەپ، داد سالدېلەر، حاضر ھەمە لرى قاتىپ ياتىدىلەر.  
- ھەمە سىنى گۈمىنى كۈر! بىرى، بىرىدىن ياۋوزراق. اولر گە  
خاتىن و پول تاپىلسە، جھاد دېگن نرسە اېس لرىگە ھەم كېلمەيدى. اېرتە  
بو بېچارە و بېگناھ قىز گىنە نى نوبتى. اول قرەخان نى و اوندن كېين  
بىشقە لرىنى يېمىشى بۆلەدى.

- مېن و سېن نىمە قىلالە مىز؟ بىرى خو اۋزىمىز جھاد قىلە-  
مىز، دېب بولرگە قۇشلىپ قالدىك. ايكىنچى دن، ايكى كىشى نېچە يۈز  
كىشى گە تېنگ كېلالەمى؟ يەنە قرەخان نى خو يىخشى تانىيسن! اونگە  
آدم اۋلدىرىش نىمە و تاۋۇق سۈيىش نىمە؟ شو ايكى آغىز گىمىزنى  
بىلىپ قالسە، بىر ساعەت ھەم تىرىك قۇيمەيدى.

- يور، كېتەيلىك! مېن بو اېشىككە تورەمەن، سېن آتخاھە  
اوستىدە پەرە بېر!

بو ايكى كىشى اۋى دن چىقىدىلەر و اېشىك، آرقە لرىدىن  
بېركىلدى. جىران اۋرنىدىن تورىپ، منجە دن توشىدى. بىر نېچە قەد  
باسىپ يوردى و قىلەدىگان ايشى اوچون اۋز كوچىنى سىن كۆردى.  
ھالى ھەم آياغ لرىدە يورماق اوچون بىر آز كوچ-قوت باراۋىدى و يۈرەگى  
ھالى ھەم جسارت دن تۇلقۇنلەنىپ، اونگە بو ايشى نى بىجىرىشە ياردەم  
بېرىدى.

جيران بىر - ايكى ساعت انتظار چېكىپ، اۋلتىردى. اوندن كېين  
استە - استە اېشىك نى آچىپ، اېشىك آرتىدە اۋلتىرگن قراول گە قرەدى.  
قراول، بىر بورچىك دە، ساووق دن بوركىنىپ، ياتىپ قالىپ، مىلتىغى تۈزە  
سى اوستىدە قۇيىلگن اېدى.

جيران ايلگىرى بارىپ، چراغ شعلە سىنى پىسەيتىردى، مىلتىغ نى  
استەلىك بىلن آلىپ، دېوار تويىدىن يورە باشلەدى. يورە گى قتيق - قتيق  
اورىپ، آياغى اختيار سىز تېز - تېز يېردن كۈتەرىلىپ، قۇيىلدى. تون  
قارانغولىگى جيران گە ياردەم بېردى. آتخانى اوستىدە تورگن قراول اۋنى  
كۈرمەي، قاچىشى دن خبردار بۇلمەدى.

قارانغولىكدە، دىوارنى سىپەلب بارىپ، تشقۇرى دەگى كىتتە اېشىك  
نى تاپتى. اېشىككە بىر كىتتە قفل اورىلگن اېدى. بو يۇل دن اۋتالمىس  
ليگىنى بىلىپ، سوو مۇرىنى نى آختردى. نېچە دىققەت سۇنگ اريغ نى  
تاپىپ، اۋزىنى مۇرىن گە يېتىشتىردى. يىخشى ھەم كە اريغ دە سوو  
آقمىسدى. سوو مۇرىنىدىن اۋتىپ، تشقۇرىگە چىقدى. قراول كۈرىپ قالما -  
سىن، دېب بىر قنچە يۇلنى استە - استە يورمەلب، تىرسك لرى بىلن  
اۋزىنى تارتىپ يوردى. اوزاقلشگندىن كېين آياققە تورىپ، چاپە باشلەدى.

بىر ساعت دن كۇپراق وقت، دىم آلمەي گاهى يورىپ، گاهى  
چاپىپ، آياغى حرەكت دن قالەياتگن وقتتە، شەر نىنگ بېرىنچى امنىتى  
بۇستە سىگە يېتىپ، سۇنگىگى قدرتى بىلن قىچقىردى:

اۋر... تاق... لر... تېز... كېلىنگ لر. مېن ياولر اويە... سىنى...  
كۈرستە مەن. اولرنى... توتىپ آلىنگ لر...

پەرە گە تورگن عىسكەر ھەمە دن آلدىن راق اۋنى كۈرىپ،  
چاپدى. آچلىك، چرچاق، ھىجان و درد دن تالىققن جيران، يۈگۈرىپ

كېلەياتىن نوبىتى قاراول و بىر نېچە عىسكىرلەر نى كۆرىپ، يۈرەگى  
 تىنچلىدى و سۈنگى قوتىنى يىغىپ، قۇلى بىلەن يوللار اوپەسى تامانىنى  
 كۆرسەتەت، ھارغىن و اوزىق - اوزىق سۆزلەيدى:  
 اكە ... جان ... تېز ... بارىنگلر! دېپ، تەكىدلىدى و ھوشىدىن  
 كېتىدى.

ابدیت گە قۇشىلگن تون

قىش فصلى نىنگ اېنگ ساووق و اوزون تون لرىدن بېرى. توش دن كېين ياغە باشلەگن قار- تۇزان حاضر گچە تىنمەي، ياغماقدە. كۈچە لر، حويلى لر و تام لر قلىن و آغىر قار يوكى آستىدە اق كفن كيىگن اۋلىك لر گە اۋخشب، قاتىب ياتگن. قىش و قار يورتىدە جىم- جىتلىك حكىم سورر.

شەرنىنگ اېسكى محلەلرىدن بېرىدە، برچىن آى اسملى عيال، تۇرت-تە كيچىك بالە سى بىلن ىشەيدى. اېرى نىنگ آتە- بابا لرىدن قالگن بو اوۋى نىنگ تامى، اوچ يىل دن بېرى كاھگل قىلىنمەگن. بو اېسكى اوۋى دېوار لرىنى كۈتەرىب تورگن چۇب ستون لر و تامگە ياپىلگن ياغاچ لر ايچىنى مور و تورلى قورت-قوموسقەلر يېب، بعضى يېرلرىنى كاواك قىلگن. بعضى يېرلرى اېسە، نم و شۇرە طفىلى چىرىگن.

بوتون شهر اولیری دېک بو اویده هم جیم- جیتلیک. گاهیده، بیر اوتلی آه، خیال لر گردابیده اؤزینی اونوتیب، یم- یم ییغلب، شوندهی ساووق و اوزون تون نی اویغاق اؤتکزه یاتگن بو اویده گی یگانه عیال، برچین آی نینگ اوتلی یوره گیدن چیقیب، بو بیر ده حیات و قیغو بارلیغینی بیلدیره دی، اما سؤنوب باره یاتگن بو آه و تاووش سیز ییغینی، خدا دن اؤزگه، هېچکیم اېشیتمهیدی هم، بیلمهیدی هم.

بیر قرهش ده- یاق، بو او ی نینگ اېشیک- تېشیگی و اسباب- انجام لریدن بېنوالیک و بېچاره لیک کؤز گه تشلنه دی. همه یاق بؤم - بؤش. اویده ایپی سیتیلیب - ییرتیلیب کېتگن بیر گلیم، کیچیک- گینه صندلی و قوراقلی کۆرپه، یاغی توگه گن بیر اریکین، بیر نېچه اېسکیرگن، رنگی اؤنغیگن و جای- جایلیری ییرتیلگن کۆرپچه و یاستیق، انچه وقت دن بېری طعام مزه سینی تاتمه گن بیر سفال طبق، سیری اوچگن بیر چاینک و بېش ته شیشه گیللاس دن تشقری، کؤزگه ایلینه دیگان باشقه بیرار نرسه یۇق.

بو اویده، برچین آی دن تشقری، اونینگ حالی بؤی- بستی یېتمه گن اوچ قیز و بیر اؤغلی آچ قارن بیلن صندلی آستیده بیر- بیر لریگه چیرمه شیب یاتیدیلر. اولر نینگ آزغین بدن لری آچلیک و ایزغیرین ساووق دن تیریهیدی. یوزلریده قان نینگ قیزغیش رنگی اورنیده ساووق نینگ کؤکچیل رنگی اوستونلیک قیله دی.

برچین آی مایوس کؤزلرینی بونداق خوار و زار بۇلیب قالگن عزیز باله لری گه تیکدی و اولر نینگ بېنوالیگی شدتی نی کؤریب، یوره- گی قتیق آغریدی و طاقتی طاق بۇلیب، باشینی صندلی گه قۇییب، ایچ - ایچیدن تاووش سیز ییغله ی باشله دی. اوزاق وقت ییغله گن دن کېین، هر

دايمىگى دېك، خاۋەرلەر و اۋتمىش دە قالگن يىخسى - يامان واقەلەر  
گردابىگە چۈكىپ كېتىدى.

برچىن آى، مەكتەب دە ۱۲ نچى صەنف نى اېندى گىنە باشلەگن  
چاغىدە، آتە سى بوپروغى گە بۇيىن سۇنىپ، آلدن ھېچ قچان كۈرمەگن  
و تانىمەگن بىر يىگىت گە فاتحە بۇلىپ، مەكتەب نى توگتەچ، مىنگىلەپ  
آرزولر و شىپرىن خيال لر بىلەن يىنگى اوبى و يىنگى حىياتى گە قەدەم قۇيىدى.  
آتە سى چەلە سواد بىر دكاندار اېدى و كىچكىنە بىنچارە دكانى نىنگ  
عايدى بىلەن رۇزگارنى تېبەرەتەردى.

اولرىنىنگ تورموشى تۈكىن - ساچىن بۇلمەسە دە، كىشى گە  
مەحتاج ھەم اېمىس اېدىلەر. برچىن آى نىنگ ايكى اكە سى بار اېدى كە  
ايكاو لرى كېت مە كېت اوروش دە ھەلاك بۇلدىلەر و آتە سى غەم - قىغۇ  
گە باتىپ، تىنمەي يىغىلار و سىقىلىش لردن يۈرەك كىلى گە  
چىلىندى. شۇندەي بىر يىل يۇق اېدى كە بو آنە زار بىر - نەچچە بار  
كەسلەخانە دە ياتىپ چىقمەسە. اول لرى برچىن آى نىنگ آتە سى بو ھال  
- احوال گە چىدەپ، خاتىنى نىنگ دوا - دەرمانى گە پۇل بېرىپ تورردى،  
اما برچىن آى تۇي قىلىپ كېتگن دن سۇنگ، صېر كاسە سى تۇلىپ،  
ايگىنچى بار اولىندى و بىرىنچى خاتىنى گە قەرەمەي قۇيىدى. برچىن آى  
نىنگ آنەسى بالەلرى نىنگ غەمى، يۈرەك كىلى، كونداش عذابى و اېرى  
نىنگ اعتىناسىزلىگى گە چىدالمەي، اۋز اجلى دن آلدن راق دىنيا نى تەرك  
اېتەدى و برچىن آى نىنگ تونغىچ فرزندى يەنى اۋز نېرە سىنى ھەم  
كۇرالمەدى.

اويدەگى قاراغولىك تا بارە قويوقلىشىپ كېتگنى و ساۋوقلىك  
مىنگىلەپ ايگىنە دېك بىرماقلىرى و بوتون وجودىگە سىنچىلگىندىن، تون آلە

قچان باشلەنیب، یریمی گە یېتگینی سبزگن برچین آی، صندلی نینگ ساووق لیگی و اۆزی و بالە لری نینگ آچ لیگینی اویلب، دعا قیلدی:

- ای خداجان، شوندهی قیل که بالە لریم ابرته گچه اویقودن اویغانمەسین لر. اگر اولر اویغانیب، مېندن نان سۆرەسەلر، اولرگە نیمە بېرە- من؟ چراغ نی یاقیشیم یا که صندلی نی ایستیشیم نی طلب قیلەلر، نیمە قیلەن؟ ابرتەلب قاتگن نان و چای بیلن اولر نی الەدیم. توشلیک دە هېچ نرسە یېماققە یۇق اېدی. گاه حکایە آیتیب، گاه اچینیم چیققن دېک قیلیب، گاه وعدە بېریب، اولر نی آچ قارن بیلن یاتقیزدیم. اېندی اویغانسەلر، آچلیک و ساووق لیککە چیدالمەیدی لر. ای خدای، یېمک اوچون هېچ نرسە بېرمس اېکن سن، هېچ بۆلمسە، اولر نی اویغاتمە.

برچین آی، قویوق قرانغولیکدە، فرزندلری نینگ یوزلرینی کۆرالمەی، قۇلینی اوزەتیب، سېپەلەدی و اۇغلی نینگ کیچکینە قۇل لرینی تاپیب، قۇل لری آره سیگە آلدی. آه، بو کیچکینە قۇل لر نە قدر آزغین و نە قدر ساووق اېدی! او، قۇلینی صندلی ایچکری سیدە قۇیلگن منقل گە اوزەتیب، چۇغ نی آچماق امیدە کاولەی باشلەدی، اما ساووب قالگن کول دن تشقری هېچ نرسە منقلدە یۇق اېدی. اوییدە نە بیر پرچە اۇتین بار اېدی، نە بیر مشت کۇمیر.

او، شو کون تندورخانە نی سوپوریب، تندورنی یاقیب تیارلەب بېرگنی عوضیگە بیر منقل چۇغ آلیب کھلیب، صندلی نی ایستگن اېدی. نانوا عیال هم برچین آی دېک کم بغل اېدی. آلتی تە اۋسمیرین و کیچیک بالەلری نی مردم نینگ نانینی پیشیریب بېریش یۇلی بیلن باقردی. او، برچین آی گە، بوندن کھین اونینگ خدمتی گە حاجتی یۇق لیگی و چۇغ کبرەک بۇلیب قالسە، فقط گینە پول بیلن ساتیب آلیشی

ممکن لیگینی آیتگن ابدی. شونینگ اوچون پېشین دن کەین باتینیپ،  
نانوا گە بارالمەى ساووب قالگن صندلى ایچیگە اۋزى و بالەلرى بوسینیپ  
یاتگن ابدیلر.

برچین آی، تۇرت یاشر اۋغلینى ایسیتیپ مقصدیدە بغریگە  
باسدی و بو ایش نى احتیاط بیلن قیلدی. او، بالە نینگ اویغانیب قالیشی و  
نان دېب ییغلیشی دن قۇرقردی. برچین آی نینگ اۋزى هم ساووق دن  
تیتتردی و اچلیک دن باشی ایلەنیپ، اۋزیدن کېتە یاتگن حالتدە ابدی. او،  
اۋتگن کون دن بېرى بیر - ایکی پیالە چای دن تشقرى هېچ نرسە نینگ  
مزە سینی تاتمەگن ابدی.

اغزى اچیق و تیلی بیر پرچە تراشە گە اۋخشې، قوروب قالگن  
ابدی. یورەگى اغیر و اوزاق اوخلش نى ایستردی، اما اچلیک و ساووق  
نینگ عذابى اونی شوندهى قیینردی که اوخلش اۋرنیدە، کۈزلردن اویقو  
کپلک دېک قاچیب کېتگن ابدی. ابرتە نینگ اۋى - تشویشلری اونینگ  
یورەگى نى سیقیپ، اېزردی. او، ينە بیر بار، "کاشکی  
بالەلریم اویقودن اویغانمەى نان سۈرەمسە لر"، دېب آرزو قیلدی.

برچین آی تېزراق اویقوگە کېتیشی اوچون سنەى  
باشلەدى: بیر، ایکی، اوچ . . . بو سانلر دوام اېتمەدى، چونکە اویقو  
اۋرنیدە، خیال لرگە شونغیب کېتدی.

اېرى، تۋى کېچەسى قنچە مەر و اېرکەشلر بیلن اونی بو  
اویگە کېلینلیک اق کیمى دە آلیب کېلگن ابدی و قنچەلیک اونی  
سېویب ارداقلردی. برچین آی گرچە آتە بویروغى بیلن اېرگە تېککن  
ابدی، اما اېرى نى بیرینچى کۈرگن دن - اق سېویب قالگن ابدی. اېرى،  
اۋقیمیشلى، نہایت مهربان و حیاتلری جدا تاتلى ابدی. اوچ قیزی

کېت مه کېت دنیا گه کېلگنیدن برچین آی تشویش لیب، قیغوگه باتگنده،  
اؤشه مهربان اېری اونگه تسلی بهریب:

- قیز اوی نینگ زینتی، آنه نینگ یاردمچی سی و آته نینگ  
غمخواری دیر. ناشکرلیک قیلمه ننگ، خدا خواهله سه، اؤغیل لیک هم بؤله-  
میز. اگر نصیب اېتگن بؤلسمه، شو قیزلریمیزی گلدېک اؤستیره میز، توی  
قیله میز. اولرگه خدا اؤغیل بېرسه، اولر نینگ اؤغیل لری بیز نینگ اؤغیل-  
لریمیز بؤله دی. منه، مېنگه قره ننگ! اکه جان دېب، اېشیگیم نی آچیب  
کېله دیگان بیرارته آپه یا که سینگیلم یوق. آغه - اینی لریم امان  
بؤل سین لر. هر بېریسی اؤز عایله سی و اؤز تشویش لری بیلن شونده ی بند  
بؤل یب قالگن لر که ییل ده فقط گینه ایکی حییت ده بیر- بیرینی کؤره-  
دی، خلاص. اوندن تشقری، مېنینگ اؤزیم اؤغیل بؤل یب، آته، آنه م گه  
نیمه خدمت قیلالدیم؟ قویننگ، سیقیلمه ننگ! قیزلریمیز، خدانینگ بیزگه  
کؤرستگن مرحمتی و انعامی دیر. اولر نی کؤزیمیز قراچیغی دېک اسره ب،  
اؤه یل ب باقیشیمیز کېره ک. اولر نی هېچ قچان کمسیتمه ننگ. یوره ک لری  
آغریمه سین، دېب آیتگن اېدی.

برچین آی اېری نینگ بونداق تسلی بهرگن لری و مهربانلیک-  
لرینی کؤریب، اؤزینی دنیا ده گی اېنگ بختلی عیال، دېب بیلردی. اېری،  
تاپگن- توتگنی نی ایکی قؤل ب، برچین آی گه تاپشیرردی، اما دولت نی  
بېره دیگان آیلگی و آرتیقچه حق الزحمه لری هم یېمک- ایچمک و هم  
پس انداز قیلیش گه یېتمس اېدی.

برچین آی آه تارتیب، کؤزیدن قلقیب تاشه یاتگن کؤز یاش لرینی  
برماق لری بیلن اړیتدی. اېری نینگ خاطره لری همېشه اونده مهر و درد

حسپاتىنى اويغاتردى. مەر، اونىنگ اونوتىلمىس مەربانلىگى اوچون و درد، اونىنگ بېوقت اولىمى اوچون اېدى.

برچىن آى اۋشە فاجەئەنى اېسلىب، يانيب كېتدى. بو فاجەئە، اونىنگ حياتىنى، وجودىنى، بوتون بارلىغى و آرزو- خيال لرى خرمىنى كويدىرىپ، كولىنى كۈكگە ساوورگن اېدى.

كوز فصلى نىنگ ساووق بىر كونى اېدى. تۇرتىنچى بار حاملە بۇلگن و حاملەلىك دورى نىنگ يېتىنچى آيىنى اۋتكزە ياتگن برچىن آى، بىر كون تورموش اۋرتاغى يۇلىگە كۈز تىكىپ اۋلتىرگنىدە، كوتىلمەگندە، اېرى نىنگ اداره سىدن بىر كىشى كېلىپ:

- سىنگىل جان، كىسلخانەگە بارىنگ، اوكتەم جان ھلاكتگە اوچرەبدى، دېگن اېدى. كېىن برچىن آى نىنگ اۋزىدن كېتە ياتگىنىنى كۈرىپ، دراۋ:

- تشويش لىنىنگ، سىنگىل جان! يىرەسى اونچەلىك آغىر و خطرلى اېمس. يىخشى بۇلىپ كېتەدى، دېب قۇشىمچە قىلگن اېدى.

برچىن آى كىسلخانەگە قىنداق يېتىپ بارگنى، اېرىنى اتاق مە اتاق، بۇلىم مە بۇلىم قىنداق پرىشانلىك بىلن اىزلىگنى و آخرى كىسلخانە دە اېمس، بلكە كىسلخانە نىنگ اولىكخانە سىدن تاپگىنىنى، فرىاد چېكىپ، اۋزىنى اېرى نىنگ جىسدىگە تشلەگنى و ھوشدن كېتگنى، كۈز آچگىنىدە، اۋزىنى توغرىق خانە دە تاپگىنىنى، ھالى ھم انىق اېسلەى آلمىس اېدى. اۋشندە او، بو ايشلارنىنگ ھەمەسىنى اويقودە قىلگندېك و بو واقە لرنى توشدە يا كە فىلىم دە كۈرگندېك اېدى. اما ھمىشە آرزو قىلىپ يورگن اۋغلى نىنگ يېتى آيلىك بۇلىپ، عىنا ياش آتەسى دىيادن كۈز يومگن كوندە توغىلگىنىنى اېسلەسە، بو واقە لرنى فىلىم يا توشدە كۈرمەگنى و

بولرنینگ همه سی چین اېکن لیگی گه یوره گی بۇلر- بۇلمس، ایشانه باشلر اېدی.

برچین آی بو واقعه دن کبین دریا- دریا یاش تۇکیب، ییغله گن اېدی، سناق سیز کبچهلر تانگ آتگونچه قرآن اۇقیب، مهربان و جوانمرگ بۇلگن اېرىنینگ رۇحیگه بغیشله گن اېدی، اما هېچ قچان، حالی گچه هم تسلی تاپمه ی، یوره گیده گی جراحات بیتمه گن اېدی. اینیقسه، هر ییل اۇغلی یادگار بېک نینگ توغیلگن کونیده، اۇشه کونگی درد- الملر و روحی قینه لیشلری ینده ینگى لنیب، هېچ قچان بیتمه یدیگان یوره گیده- گی اېسکی یر، ینده تازهلنیب، آغریب باشلردی. اۇغلی گه رحمی کېلردی، چونکه اونى قنچهلر آرزو قیلگن بۇلمه سین، بیرار قتله هم توغیلگن کونیده اېرکەلب، بیرار ساوغه یا تبریک سۇزى بیلن سییله مه گن اېدی. حتی بیر قتله هم اونینگ توغیلگن تاریخی و کونى حقیده گپیرمه- گن اېدی. همېشه اونینگ توغیلگن کونى بیرهم اېمس، بلکه خاطرلش و قدرلش، عزا و ییغى- سیغى کونى گه ایلەنر اېدی.

برچین آی، گاهیده اۋزیدن: "مېندېک اېرلریدن آیریلگن باشقه عیاللر هم، باله لریدن آیریلگن آنەلر هم، آتە- آنە دن آیریلگن بالەلر هم بار- کو! کۇپلری آی و ییل اۇتیشی بیلن، قیغو- الملرینی اونوتیب، سېکین- سېکین عادى حیاتگه قیتە دیلر. مېن نیمه اوچون تسکین تاپالمە یمن؟"، دېب سۇرردی. او، بیلرمیدی یا بیلمس میدی، اما اېرى وفاتیدن کبین یوز بېرگن واقعه لر و کبت مه کبت کېلگن مصیبتلر و کوندن- کونگه آشیب بارگن و باره یاتگن محروملىکلر و ناچارلىکلر سلسله سی اونگه اونوتیش امکانينى بېرمسدى.

آرقەگە قرەسە، اپرى نىنگ اۋلىمىدن كېىن، بىرار ياروغ كون، بىرار قووانتىروچى واقە شاهدى بۆلمەگن اېدى. آلغە قرەسە، ھېچ يېردىن ھېچ بىر ياروغلىك منبعى يا ياردىم امىدى كۆزگە تشلىنس اېدى. گۇيا اپرى، اونىنگ قووانچى و امىدىنىگىنە اېمس، حتى كە تقدىرى و رزق-رۈزىسىنى ھم اۋزى بىلن بىرگە ابدىتگە آلىب كېتىگن اېدى. برچىن آى اېسلەى باشلەدى:

اپرى نىنگ اۋلىمىدن بىر يىل اۋتر-اۋتمس، كوتىلمەگندە ناتانىش كۈرىنىشلى، غيرمعمول قرە كىيىم كىيگن، قرە سلە اۋرەگن، اوزون ساچلى، ياووز بىيگانەلر شەرگە باستىرىپ كېلىدىلر.

اولر نىنگ ھر تۇرت-بېش كىشىسى بىر داتسون مۇترگە مىنگن و مۇترلىرىدە اېسە آق بىراقلر كۈتەرلىگن اېدى. اولر، قۇللىرىدەگى قمچىلر و درەلر بىلن كۈچە و بازارلر، ايشخانە و مەكتەبلەردە ايشلب يورگن عىاللارنى اورىپ، اۋىلرىگە جۇنتىدىلر و اۋىدن تشقىرىگە چىقىش، حتى كە دېرەزە دن تشقىرىگە قرەشنى ھم قەدغن قىلىدىلر. اولر، بوىروقلرىگە بۇيىن سۇنمەگنلرگە قەتئىق جزا بېرىشلىرىنى آيتىدىلر.

برچىن آى، اۋشە كوندىن باشلب، اېشىگە بارالمەى، اۋىگە اۋلتىرىشگە مجبور بۇلدى. روزگارنى تېرەتەش اوچون پولىگە محتاج اېدى. اپرى اۋلە-اۋلگۈنىچە صداقت بىلن خەمت قىلىپ، خىانت و پارە-خۇرلىك يۇلى بىلن بايلىك آرتىرىش پىيدە بۆلمەگن اېدى. اداره نىنگ آيلىگى و رسمى وقتىدن تشقىرى كۇپراق ايشلەگنى اوچون قۇشىمچە آيلىگى دن اۋزگە، بىرار درآمد يا عايد منبعى يۇق اېدى. اۋىلرى اۋزلىرىدىن اېدى، شونىنگ اوچون تۈكىن-ساچىن حيات كېچىرمىسەلر ھم، كىشىگە محتاج بۆلمەى، بختلى يىش اېدىلر.

اېرى وفاتىدىن سۇنگ، اونىنگ تقاعد پولى و برچىن آى نىنگ  
 آيلىگى آز بۇلسە ھەم، رۇزگار تېرە تېش اوچون يېتىردى، اما يات  
 باسقىنچىلر كېلىپ، عياللارنى ايشلاش دن، تشقۇرىگە چىقىشدىن منع اېتگن  
 لرىدىن كېيىن، رۇزگارى كوندن -كونگە يمان لىشىپ كېتىدى.

اوللرى، يمان كونلر يا كوتىلمەگن واقعهلر اوچون غەلب قۇيگن  
 پوللرىنى، آز- آز ايشلەتەتتوردى. «ياتىپ يېسە، تاغ چىدەمس» دېگن  
 لرىدېك، بو پول ھەم توگب قالدى. كېيىن، بالەلرى نىنگ ياتاغىنى اۋشە  
 نانوا عيالگە اجارەگە بېرىپ، اۋزى اېسە، بالەلرى بىلن بىر اتاقدە يشەي  
 باشلەدى. اجارە حقى جدا آز اېدى. شونىنگ اوچون كەم- كاستى نى  
 تۇلدۇرۇش اوچون اويىدەگى اسباب- انجام لرنى بىرىن- كېتىن ساتىپ،  
 پولىنى سرفەلدى. بو اسباب- انجاملارنىنگ ھەر بىرى، اونىنگ بختلى  
 دملرىدىن بىر نشانە اېدى. ھەر بىرىسى يورەگى نىنگ بىر پرچە سى اېدى.  
 اولارنىنگ ھەر بىرىنى، اېرى بىلن بىرگە بازارگە بارىپ، قىدىرىپ-  
 قىدىرىپ، اۋز سلىقە سىگە مناسىپنى تىلەپ آلگن اېدى. بعضى لرىنى  
 توغىلگن كۈنى، ۸- مارچ عياللر بىرەمى، بالەلرى نىنگ ھەر بىرى سىگە  
 حاملە بۇلگىنىدە يا اولر توغىلگن دە، اېرىدىن ساوغە آلگن اېدى. بولارنىنگ  
 ھەر بىرى اونگە قدرلى و عزيز اېدى. ھەر بىرىنى ساتگىنىدىن كېيىن، بىر  
 بورچككە بارىپ، يىم- يىم ياش تۇكىپ، يىغلەردى.

گاھى اۋزىگە: اوكتەم جان دېك اوكتەم يىگىت و مېھربان اېردن  
 آيرىلدىم. اونىنگ اېنگ قدرلى اېسەدەلىكلرى بالەلرىم اېمىس مى؟ بو  
 مېدە- چىدە اېسەدەلىكلرنى بالەلرىم نى باقىش اوچون ساتەمەن-كو! بولر  
 قنچەلىك عزيز بۇلمەسەن، بالەلرىمدىن عزيزراق اېمىس. «يخشى مال،  
 يمان كۈنگە يىرر» دېگن لرىدېك، بولارنى شۈندەي يمان و آغىر كۈنلردە

ايشلتمەسم، قچان ايشلتمەن؟ اوكتەم جان نینگ روحي، آغير احواليم نى كۆريب، بو ايشيم اوچون مېنى كېچىرر، دېب تسلى و تسكين بېردى، اما گاهى تصورىده، اپرى مأيوس نگاهلرینی اونگه تىككن دېك، بو اېسدەلىكلر ساتیلیب كېتەياتگنى اوچون محزون دېك تويولر اېدى. شونده برچین آی، باشقە بىرار يۇل تاپیش حرکتی گە توشردى و هېچ بىر امید بۇلمسە-دە، هر کیمدن اویده بجهريله ديگان ایشنى سۇراغلب تورردى.

بىر كۈن، قۇشنىسى اوندىن، ايكى قىزىگە سواد اۋرگەتیش و قرآن دن سباق بېرىشنى سۇرەب قالدى. برچین آی، اپرى وفاتیدن كېين، بىرىنچى بار سېوينیب كېتدى. بو ایش «هم ثواب، هم خرما» اېدى. هم مکتب گە بارالمەي، سوادسيز قالگن قىزلرگە سواد، اينىقسە، خدانینگ كلامى قرآنكریمنى اۋرگەتر و ثوابی گە شریك بۇلردى، هم اولردن توشگن آز- ماز پول، نان و سر- پالر، شوندهی آغير شرايطده رۇزگار تېرەتیش اوچون اونگە كتە ياردم بېردى.

بو ثوابلى ایش نینگ يەنە بىر فايدهسى بار اېدى. او، قىزلرگە درس بېرە توريب، آز بۇلسەدە، اونى جۈرەتەديگان، يۈرەگىنى آغيریتە- ديگان و روحىنى اېزەديگان قىغولى خاطرەلردن چلغيتیب تورردى. او، درس بېرىش وقتیده، اۋتمیشدەگى خاطرەلرنى هم، كېلەجك دەگى قرانغو، اميدسيز و ايشانچسيز كونلرنى هم اۋيله مس اېدى. بو دملر اونینگ بۇم- بۇش حياتىنى تۇلديرش گە ياردم بېرىب، مضمون سيز و اميدسيز حياتی گە ينگى بىر مضمون كىرىتەردى، اما افسوس كە بو كىچكىنە امید يولدوزى هم اوچ- تۇرت آی دن كېين سۇنيب قالدى.

اۋشە ناتنىش، غيرعادى كىينگن ياووز ياتلردن بىرى، بىر كۈن اېشيكنى تقيلىتدى. شاگردلر نینگ اېنگ كىچىگى بارىب، بىر كاغذنى

آلیب کەلدى. کاغذە، مەکتەخانە آچیش و قىزلەرگە ھەرقەندەى علم دن سبق بەریش گناھ حساب لىگنى، شو کون دن- آق، مەکتەخانە ياپىلىشى کپەرەک لىگى، ياپىلمسە، اۇقىتووچى ھەم، اۇقووچىلەر ھەم آغیر جزاگە تارتىلىشى انىق لىگى يازىلگن ابدى.

برچىن آى ناچار احوال گە توشدى. او بالەلرىنى تۇيغەزىش اوچون، ھەرقەندەى جزاگە ھەم تيار ابدى، اما معصوم اۇقووچىلرىنى خطرگە قۇيالمىدى، چونكە اخطارىھە مەكتوب دە، اولرگە ھەم تېگىشلى جزا قىد اېتىلگن ابدى. شونىنگ اوچون، مەكتەخانەسىنى ياپىپ، يەنە اۇز قىغولرى گردابىگە چۆكىپ كەتدى.

بوندىن كېيىن نىمە قىلىشى مەمكىن ابدى؟ بو دىيادە بىر اۋزى، تۇرتتە كىچىك بالەسى بىلەن نىمە قىلە آردى؟ نە آنەسى بار ابدى، نە ياردەم بەروچى اكە- او كەلرى. اوزاق قىرىنداشلىرى بۆلسەھەم، بو آغیر شرايطدە امكانىتى بۆلگنلرى وطنىنى تەشەب، قاقىپ كېتىگن اېدىلەر. قالگنلرى اېسە، يوز تومەن عذاب- عقوبەت لرى باشدىن كېچىرىپ، زۇرغە اۋز عايلەلرىنى باقر اېدىلەر. بوندەى پىتدە كىشى- كىشىگە ياردەم بەریش او ياقدە تورسىن، خەبەر آلىش و حتى كە بىراو نىنگە جەنازە و فاتحەسىگە بارىش گە ھەم باتىنە آلمىدى. كىشى اويدىن چىقسە، قچان و قندەى قېتىپ كېلىشىنى آلدىن دن بىلە آلمىدى. قېتىپ كېلە- آلىشى ھەم گەمان و امىد ابدى- خلاص، چونكە ھەر لحظە و ھەرقەدەم كوتىلمەگن بىر حادثە يوز بەرىشى و بىر بلا ياغىلىشى مەمكىن ابدى.

برچىن آى آتەسىنىنگ دكانى گە راکت تېگىپ، دكان و دكان دە- گى آدمەر و ماللرىنى پرچە- پرچە قىلىپ، پرچەلرىنى اۋت و توپراق بىلەن ھواگە اوچىرگن ابدى. آتەسىنىنگ قۇلىنى بىر يېردىن، آياغىنى باشقە بىر

يېردىن، تەنە سىنى باشقە بىر يېردىن تاپىپ ئايب، بىر يېرگە يىغىپ، دىن  
ئېتىگەن ئېدىلەر.

بو ۋاقىتتە، ئۆكتەم نىنگ ۋاقتىدىن بىر نېچە يىل ئالدىن يۈز بېرگەن  
ئېدى. ئۆكتەم نىنگ ئاكا- ئۆكەللىرى ھەم باشقىلار سىنگىرى ئۆزىگە يۈرتلەرگە  
كېتىپ، مەھاجىرت دە ئاۋارە بۇلىپ يۈرگەن ئېدىلەر. ئۆلۈشنىڭ خەت ۋە خەتلىرى  
ھەم، ئانە شۇ ياتلار ھۆكۈمىتى باشلىغاندىن سۇنۇڭ، كېلىمەي قالغان ئېدى.  
يىلغۇزلىق ۋە ئۆلۈشنىڭ ئۆستىدە ئادارلىق قىچىلەر ئاغىر! بىرچىن ئا بۇ  
خەتلىرى ئېسىل، يەنە يىغىسى كېلىدۇ. ئاۋۇش چىقىرمەي، ئاچ- ئاچىدە  
يىغەي باشلىدى. بۇندەي يىغەلەمەك، ئۆلۈشنىڭ ھەتتە ئايشى ئېدى.  
ھەركېچە، ئالەللىرىنى ئۆلتۈرگەن كېيىن يىغەي ۋە ئامان خەتلىرى چىڭگەلگە  
ئاسىر بۇلدى. بو خەتلىرى ئۆزىگەمچە دېك، ئۆلۈش ئايب، سېكىن-  
سېكىن قانۇنى شىمىرىپ ئاچىدۇ. ئۆلۈشنىڭ ياشلىقى، گۈزەللىكى،  
قۇۋۋىتى، ئامىدى، ھاياتىگە قىزىقىشى يىلدىن يىلگە يا ئۆلۈش ئا بۇ،  
بىلەن كۈندىن كۈنگە سۇنىپ بارىدۇ. ئۆلۈش تۆرت يىل، ئۆلۈش كۈنلىكى  
سىنىق، ئامۇس، كىل ۋە قىلغە ئۆزىگەمچە قۇيىپ قۇيىپ ئېدى. ئۆلۈش بار  
نەرسە، قىلغە كۆز ياشلىرى ئېدى- خەتلىرى. بو كۆز ياشلىرى ئامۇس بۇلسە ھەم،  
بەھارنىڭ ئۆرتە لىرىدە، يازدە ۋە ھەتتە كۆز ۋە قىشە ھەم ھەتتە لىرىدە  
ياغىمىلىقى مۇمكىن ئېدى، ئامۇ ئۆلۈشنىڭ كۆز ياشلىرى تۈگەمسە بۇلاق كېيى،  
تېنەمەي ئاچىدۇ. ئا، گەھى ھەتتە بۇلىپ، ئۆلۈشنىڭ سۇرىدۇ:

- تۆرت يىل دېر كە تېنەمەي يىغەلەيمەن ۋە ياش تۈگەمەن، ئامۇ بو  
كۆز ياشلىرىم غەم- قىغۇل غەللىنى يۈرەگىمدىن يۈرەكلىمەيدۇ، ئۆزى  
ھەم ھېچ تۈگەمەيدۇ. مۇنچە كۆپ كۆز ياشلىرى قەيىردىن تاپىلەيدۇ؟

كۆز ياشلىرىمنى بېر يېرگە يىغىسم، كۈل بۆلمىسىدى يا اريغ بۆلىپ آقمىس -  
مىدى؟

برچين آى اۋغلى نىنگ كىچكىنە قۇللىرىنى قۇلىگە آلىپ، سىلە -  
دى. بو نازك قۇلچەلەر اۋشندەى ساووق اېدى. بالەسىگە اېگىلىپ، نفسى  
ھرمى بىلن اۋشە قۇللىرىنى ايسىتە باشلەدى. يىغىدن كېين ھر دايمگى دېك،  
قباقلرى شىشىپ، باشى آغىر بۆلىپ قالدى. كۆرپە بىلن بالەلرىنى يىخىشلىپ  
ياپدى و اويقوگە كېتىشدىن آلدن، اۋزىچە شىويرلەدى:

- اېرتەگچە بالەلرىم اويقودن اويغانمىسەلر، بۇلدى. اويغانىپ نان  
سۈرەسەلر، نىمە بېرەمن؟ اېرتەگە اريكىننى ھم، منقلنى ھم ساتىپ،  
پولىگە نان آلەمن. منقلنى نىمە كېرەگى بار؟ قديملىردېك يېردن اۋچاق  
قازەمن. اريكىننى ياغى بۆلمىسە، اۋزى نىمە كېرەك؟ اېرتە نىنگ  
علاجىنى قىلىسم بۇلدى. ايندىن نىمە بۆلىشىنى خدادن تشقۇرى كىم بىلە -  
دى؟ اي خدا، فقط شو كېچە بالەلرىمنى اويغاتمە ....

اۋشە كېچە ھم، اېرتەسى ھم برچين آى و بالەلرى  
اويقودن اويغانمەدىلر. شونچە وقتلردن كېين، اونىنگ دعاسى خداوند  
درگاھىدە اجابت بۆلگن اېدى. اېرتەسى، تانگ سحرده يېر قىمىرلىشىدىن  
اويغانىپ، سراسىمە كۈچەگە چىققن آدملىر، كۈچەنى تانى آلەمدىلر. قنچە  
اۋىلر يىقىلىپ، ويرانەگە ايلنگن اېدى، قنچە آدملىر اۋلىپ، قنچەلرى  
تيرىكلەيىن توپراق آستىگە كۆمىلگن اېدىلر.

ھركىم اۋزعايلەسىنى قىدىرىپ، قوتقرە باشلەدى. برچين آى و  
بالەلرىنى ھېچكىم سۈرمەدى ھم، قىدىرمەدى ھم، قوتقرەرىش پيىدە  
بۆلمەدى ھم. فقط خدانىنگ اۋزى عرش اعلا دن، برچين آى نىنگ يېر  
بىلن يىكسان بۆلگن اۋىيگە قرەب تورگن اېدى...

# سۈنگى يۇل

اېندی اېرتنگى چايىمىزنى ايچىپ توگتكن اېدىك. مېن آشخانه  
 گە كىرىپ اېدىش لرنى يوويب باشلەگن اېدىم و تورموش اۋرتاغىم اويغون  
 اېسە، كيىم لرېنى المشتىرىب، ايشىگە كېتىش ترددې دە اېدى. شو  
 وقت دە حويلىمىز نىنگ اېشىگىنى كىم دىر، تقيلتدى. بونداق اېرتە تانگ  
 دە بىراو نىنگ كىلىشىنى كۈتمەگن اېدىك. عموما آلگندە بوندن ايلگرى  
 ھېچ قچان شونچە وقتلى بىزگە مېھمان كېلمەگن اېدى. شونىنگ اوچون  
 كۈتيلمەگن بو اېشىك تقيلەشى مېنى  
 حىران قىلىپ، بىر آز سراسىمە گە سالدې. تورموش اۋرتاغىم  
 اويغون جان گە :

اېشىككە بارىنگ! بوندى تانگ سحرده كىم كېلدى اېكن؟

الھىم خىرىت بۇلسىن، دېدىم .

اويغون جان كرتى سىنى كىيىپ تۇرىپ، تشقىرگە شاشىلدى و مېنگە: قۇشنى لردن بىرارتەسى دىر، دېب حويلىگە چىقدى. حويلى اۋرتە سىدە يېتىگىدە، يىنە اېشىك تقيللەدى. اويغون جان تېزراق ادىم باسيپ، اېشىك ارقە سىدە تورگن آدم گە:

- بىر دقيقە صبر قىلىنگ، منە... حاضر... كېلدىم، دېدى و اېشىككە يېتىپ بارىپ، اۋنى اچدى. مېن دىرەزەدن قرەب تۇردىم. اويغون جان بىلن كېلگن آدم نىنگ اۋازى ھم اېشىتىلمەدى، بىرار كىشى ھم كىرىپ كېلمەدى. اويغون جان نىنگ ارقەسى مېنگە كۆرىندى و كىم بىلن دىر، گىرىپ تورگنى و صحبت ارەسىدە تصديق مى، تأسف مى، قندەى بىر توشونرسىز حالت اوچون باشىنى بىر- ايگى قتله قىمىرلەتىپ

ھم قۇيگىنىنى كۆردىم، بىراق صحبتلريدن بىرار سۇز ھم قولايغىم گە چلىنمەدى.

بىر نېچە دقيقەدن سۇنگ، اويغون جان اېشىك نى يايىپ، ايشى گە كېتىش اۋرنىگە، اۋى گە قىتدى. اول بىرار نرسە نى قالدىرگن بۇلسە كېرەك، دېب اۋىلەدىم، لېكن او، ياتاقخانىە يا كە اۋلتىرىش اۋىگە كىرمەى، اىشانەگە مېنىنگ الدېم گە كىردى. بىر قرەش دە، اونىنگ كۆزى و يۈزىدە عكس اېتىپ تورگن قىغونى كۆرىپ، يوكسك بلندلىكدن، بىر دنىگە جودە چقورلىككە توشگن دېك يۈرەگىم شوويللېب كېتدى. يامان خبر اېشىتىشىم انىق اېدى. اۋز-اۋزىمگە:

- خدایا، ھر قندەى بالا- قضالردن اۋزىنگ اسرە، دېدىم.

اويغون جان قىغولى كۆزلىرىنى مېنگە تىكىپ، يۈرەگى بۇلر- بۇلمس دېك، مونگلى اۋاز بىلن سېكىن گىنە:

- توركان جان، كييم لرينگيزنى المشتيرينگ، قارهراق بيرار نرسە كيینگ، قَرس- مَرس، چادر- پادرينگيزنى ھەم باشينگيزگە ساليڭ، دراۋ باريشيميز كېرەك، دېدى.

- قەيەرگە؟ نېمە گپ بۇلييدى؟ خىريت مى، اۋزى؟

- اۋقوۋچينگيز نوراي لرنىكى گە بارەمىز.

- او يېردە نېمە قىلەمىز؟ يەنە بوندەى وقتلى؟ بيرار گپ بۇلييدى

مى؟

- ھە، كۈنگۈل سىز بير واقە يوز بېرييدى!

- واي، نوراي نينگ آنە سىنى قان باسىمى يوقارى اېدى و ھر

وقت كسل بۇليپ، كسلخانە لرگە ياتيپ تورردى. يەنە كسل بۇلييدى مى؟

- آنە سى اېمس، اۋزى تۇرتينچى قَبْت دن

يىقىليپ ...

اويغون جان نينگ سۈزى توگەمەى، در حال پريشان و اميدوار

سۈرەدیم:

- قتيق شكست تاپمېدى مى؟ تيريك مى، اۋزى؟

او، بير لحظه جواب بېرمەى، مېنگە قرەب تورردى. قلتيراق قۇل -

لرېمدن گېلاس نى آليپ، كاشكى قۇل-ياغى سىنيپ، قتيق يرەلنەسە

اېدى، اما ...

ز

يەمە؟ خدا اسرەسین ... او ...

گېم نى توگە تيش گە تيليم بارمەدى. «اۋليم» سۈزىنى آيتيش

ھەم، اېشيتيش ھەم آغیر اېدى. سۇراق دن تۇليق كۇزلىم نى اويغون جان

نينگ لب لريگە تيكديم.

سۇراقىدىن تۆلە كۆزلىرىم نى اويغون جان نىنگ لىلرلىگە تىكىدىم. يورەگىم تېز- تېز اوريىب، رنگىم نىنگ اوچكىنىنى مىنگلەيىم و قۇللىرىم دە ساووق تېر تاپىلگىنىدىن سېزدىم. اويغون جان ھەم ھالىم نى كۆرىپ، قۇلىدەگى گېلاس گە سوو كېلتىرىپ، مېنگە اىچىردى و يىلكەم نى اوشلىب، مېنگە تىكىلىپ:

- اۋزىنىگىزنى ددىل توتىنگ. اۋلىم ھىروقت، ھەر يېردە ھەركىمگە اوچرەيدى. ھازىرگى شرايطدە اۋلىم دىن كۆيى يۇق. خدا نورائى نى رحمت قىلىسەن. يىخشى قىز اېدى. البتە روى جنت گە يىتىپ بارگەن بۇلسە كېرەك، دېدى.

اۋشە وقتگچە يورەگىم دە سۇنمەگەن بىر امىد يالقىنى بار اېدى. بو سۇزلار اۋشە امىد شەلە سىنى ھەم سۇندىردى. كۆزلىرىم دىن ايكى تامچى قىناق ياش تىزىلپ چىقدى، بىراق بىدىم موزىل، قۇل- اياقلىرىم تىترەپ تاختەآلمەي، اۋلتىرىش گە مجبور بۇلدىم. اويغون جان مېنى تىلى بېرىپ، يوشاق سېس يىلن:

- نورائى نىنگ جنازە سىنى ساعەت اۋن بىر يىرىم دە اوىلرىدىن چىقىر اېكنلر. يىكە بارالمەي سىز- كو! تېزراق بۇلسىنگىز، ايشگە بارىشىم دىن آلدىن سىزنى اولرنىكى گە آلىپ بارەمەن.

- سىز ايشگە بارەسىز مې؟ جنازەگە بارمەي سىز مې؟

- سىزنى يېتىشتىرىپ، اول ايشىم گە بارەمەن. كېين رىخست آلىپ، جنازەگە اۋزىم نى يېتكزەمەن. ايش گە بارمەسم بۇلمىس- لىگىنى اۋزىنگىز بىلەسىز- كو. بو شرايط دە بىر كون ايش گە بارمىلىك، يوز خىل گپ- سۇزلر و شك- شېھەلرنى اويغاتىشى مەكەن. تورىنگ، تېزراق كىيىم لىرىنگىزنى كىيىپ، تيار بۇلىنگ.

اۋرنیمدن توردیم. یوره گیم ده گی قیغو- درد ساووق  
 آه بۇلیب، لب لریمدن و قیناق یاش بۇلیب کۈزلریمدن چیقردی. ییغلب-  
 ییغلب تام گه کیردیم. قره کۈیلک کییب، آق قَرس و چادریم نی  
 باشیمگه سالیب، اویغون جان بیلن بیرگه اویدن چیقیدیم.  
 اویغون جان تاکسی کرایه قیلیب، مېنى اوچینچی  
 مکروریان گه، نورى آی لرنینگ بلاکی گه یېتیشتیریب، اۋزی اۋشه تاکسی  
 بیلن ایشی گه کبتدی.

نورای لرنینگ دهلیزی آلدیده ابرککلر و باله لر  
 تۈپله نیب تورگن ابدیلر. کۈپلری نینگ کۈزلریده یاش قلقيب تورگن،  
 بعضی لری نینگ کۈزلری قیزرگن، بعضی لری اېسه، محزون بیر چپته  
 توریب، خیال لرگه چۈمیلگن اېدی. کېلگن لر ایکی- ایکی، اوچ- اوچ  
 کیشی بۇلیب، استه- سېکین اۋز ارا صحبت لشر ابدیلر. دهلیزدن،  
 آپارتمان دن عیال لرنینگ ییغی- سیغیسی اېشیتیلردی، کیم لر دیر  
 ایتیمچیلیک قیلیب، نورای نینگ یخشی لیگی نی، داد و فریاد بیلن بیان  
 قیلردی، اما اوزاقدن بو سۈزلر انیق اېشیتیلمس اېدی. کوچسيز و تیتراق  
 ایاق لریم بیلن زینه لر دن چیقیب، تۈرتینچی قَبت گه یېتیشدیم. نورای و  
 قۋشنى لری نینگ آپارتمان لری اېشیگی آچیق اېدی. دهلیزده، آپارتمان لر  
 اېشیگی آلدیده و اوی لر ایچیدهاق قَرس لی، قره کییم لی عیال لر تۈپ-  
 تۈپ ییغیلیب تورگن ابدیلر. بعضی عیال لر قۇللریده گی آق رۋمالچه لری  
 بیلن کۈزلریدن آقوب تورگن یاشلرینی آریتیر، بعضی عیال لر کۈپ ییغله گن-  
 دن کۈز یاشلری قوریب، کۈزلری قېزرگن و سېس لری توشیب قالگن  
 اېدی.

مېنى بىر عيال ايچكۈرىگە، نورآى نىنگ آنە سى  
 و يقين كىشىلرى اۆلتىرگن اوىگە باشلې باردى. بوتون وجودىم مور-  
 مورلې، قۇل- آياق لىرىم موزلې، ايچ- ايچىم نى قلتىرەتمە قمرەب آلگن  
 اېدى. اېشىك آلدىدە قاتىب قالدېم. كىرىشگە و نورآى نىنگ آنەسىگە  
 قرەش و تسلى بېرىشگە كوچىم و جسارتىم يېتمىس و قىتېب كېتىشگە  
 ھم يۈرەگىم چىدەمس اېدى. تىلىم قاتىب، تىنگەلىمگە ياپىشىگن، آغزىم  
 آغو ايچگن دېك اچىق اېدى. كۈزلىرىم دن بېاختيار ياش  
 تامچىلرى آقېب، يۈزىمنى يۈوردى، اما سېسىم چىقمەي بۇغىلىپ قالگن  
 اېدى.

عياللر و ياش قىزلىرىنىڭ يىغى- سىغىلرى، داد و فرىادلرى  
 اوى نىنگ در و دېۋارىگە اۋرەلېب، عكس صداسى قولاقلىرىنى گوۋىلە-  
 تىب، آغىر قىلدى. اېشىككە تېنەپ قنچە تورگىنىمنى بىلمەيمىن، اما بىر  
 عيال سېكىن گىنە قولايىمگە:

- نورآى نىنگ آنەسى، يىنگە و قىرىنداشلىرى منە، بو تاماندا  
 اۆلتىرىدىلر، دېب شىيىرلەدى و قۇلى بىلن اېشىك نىنگ سۇل تامانىنى  
 كۈرسىدى.

كۈزلىرىم اېندى آچىلېب، يان- اطرافنى كۆرە باشلەدى. اوى  
 نىنگ تېگرەگىدە آق قىرلى عياللىرى زىچ اۆلتىرگن و بىرچەسى آق رۇمالچە  
 لىرىنى كۈزلىرىگە سورتىپ، ياشلىرىنى آرتىدىلر. اوى نىنگ اۋرتە سىدە  
 نورآى نىنگ جىسدى اوزەلېب ياتگن اېدى. بىر كۈن آلدىن قووناق حىيات  
 حرارتى و ياشلىق آرزولر ھورومى ايسىق سىقلەگن بو نازىن جىسم، اېندى  
 ساۋوب قالگن و تېگرەگىدە قرآن آيتلىرى آلتون رىنگلى زر بىلن تىكىلگن  
 يىشىل شال آستىدە قاتىب ياتگن اېدى.

كۆزىمنى بو جىسدن اوزالمىس اېدىم، ايشانىش قىين اېدى. بىر كۈندە ساپە- ساغ كولىب- اۋىنب يورگن ياش گىنە گۈزەل قىز قىنداق اۋلىب قالىشى و بېجان جىسدگە ايلهنىشى مەمكىن؟

بىر عملىب، نىگھىمنى بو عزيز جىسدن اوزىب، يىغلىب- يىغلىب خالدىن تايگن بېچارە آنەنىنگ ائلىگە باردىم و اۋنى قوچاقلىدىم. كۆز- ياشلىرىمىز بىر- بىرىگە قۇشلىدى. ھۇل يوزىنى اۋپىدىم، اما تىلى بېرىش اوچون بىرەر سۆز تاپالمىدىم. نورآى نىنگ آنە سى مېنى كۆرىپ، يىنە بىر بار فرىاد چېكىپ، يىغلى بىشلەدى. اونىنگ تىتراق مۇنگلى آوازى، دردند تۆلە فرىادى در و دېۋارنى ھىم، مېنىنگ وجودىم نى ھىم، شايد بوتون بىر و آسماننى ھىم تىترەتتى.

نورآى نىنگ بېوقت اۋلىمى، بىر نېچە ساعىتدە بو المىزدە آنەنى نېچە يىل قىرتىگن اېدى. كۆزىدىن نور و چىرە سىدىن رنگى اوچىپ، اۋلىك لىرگە مى، قىتىق كىسلگە مى، اۋخىش قالىگن اېدى. اونىنگ كۆزلىرىنى كۆرىپ، يۈرەگىم يامان بىر نىرسەنى سېزگن دېك بۇلدى. بىر نېچە دىقىقە يىغى- سىغى دن كېين، المىزدە آنە دن ايرىلىپ، عىاللار آرە سىدىن اۋزىمگە بىر اۋرىن اچىپ، اۋلتىردىم.

نورآى اق كفن گە اۋرەلىپ، سۇنگى اۋىي گە كېتىش اوچون غىرعادى كېلىن كۇنگىلىنى كىيىپ ياتىگن اېدى، بىراق اونىنگ خاتىرەلىرى، چۈچۈك سۆزلىرى، قوۋناق كۆزلىرى و گۈزەل چىرەسى ھىرلىظە كۆز اۋنىگىمدە اېدى. او، اۋلىگن بۇلسە ھىم مېنىنگ دىھنىم و تىصورىمدە ھىمان تىرىك اېدى. اۋشە شۇخ، قوۋناق، ھىلچى، سېرگپ، عادى گىنە سۆزگە كۈلەدىگان، استىدادلى، ھىنرلى، چېچن و چېۋر قىزىنىنگ بونىدق جىمىلىگى تىصورىمگە سىغىمس اېدى. بوندىن كېين، يىنگى يازگن

شەر و داستان لرنى كۈتەريپ اويىم گە كېلمس ليگى گە، اۋزى بيلن بير  
دنيا يىنگى خبرلر، بير عالم قووانچ، كولگو و ذوق- شوق آليپ كېلمس  
ليگى گە ايشانگىم كېلمس ابدى.

اونىنگ بېوقت اۋلىمى سبب سىز بۇلىشى ممكن اېمس ابدى. بو  
معمانى آنەسى نىنگ داد و فريادى، آلقىش و قرغىش لرى آرەسىدن بيرآز  
يېچىش ممكن ابدى، خلاص. او يىغى- سىغى سى آرە سىدە:

«نامراد قىزگىنەم ... سېن اۋزىنگ نى بىزلر اوچون قربان  
قىلدىنگ ... آه ... سېنى اۋرنىنگدە مېن قربان بۇلسم، بۇلمس مىدى؟  
حياتىم گلى... آنە نىنگ بند دلى... مېنى تشلب قەپىرگە كېتىدىنگ؟  
...بىز عمرىمىزنى يشب بۇلگن ابدىك، بىز اوچون قربان بۇلىشىنگىنى نىمە  
كېرەگى بار ابدى؟... الهى سېنى شو حالگە تشلەگن ياووزلر هېچ قچان  
عمرلريدن بېرە كۇرمەسىن لر ... الهى خدانى غضبى گە اوچرەسىن لر...  
الهى اولرنىنگ آنە لرى هم مېندەى زار- زار يىغلب، يورەك- بغيرلرى  
كباب بۇلىسىن ....

يانىمگە اۋلتىرگن ياش عيال دن:

- تۈرتىنچى قېت دن قندەى يىقىلب توشىبدى؟!  
بىرار نرسە بىلەسىز مى؟ دېب سۇرەدېم.

عيال باشىنى تأسف بيلن قىمىرتىپ:

-ايىق بىلمەى من، اما يىقىلمەگن، بلکہ اۋزىنى اۋزى قوبى گە  
تشلب اۋلدىرگن، دېگن گپنى اېشىتىدىم، دېدى.

عيال نىنگ بو آيتگن سۆزلرى حقيقت گە يقين كۇرىندى،  
چونکہ نورآى آنە سىنىنگ سۆزلريدن او، اۋزىنى آنە- آنەسى و عايەلە-

سینی قوتقهریش اوچون قربان قیلگنی و بو قربان بؤلشی گه کیم لر دیر، سببچی اېکن لیگی گه اشارت لر بار اېدی.

دقیقه لر و ساعت لر جوده سېکین اؤتردی. ییگی - سیغی لر گاهیده بیر نېچه دقیقه اوزیلیب، آغیر بیر سکوت فضائی قمره ب آلردی، اما تعزیه اوچون ینگ بیر کیشی نینگ کیریپ کېلیشی، بو سکوت نی ینه سیندیریپ، ییگی - سیغی لر و داد و فریادلر اوج آلیشی گه سبب بؤلردی. ییگی - سیغی لر شونچه لیک مونگلی و قیغولی اېدی که، اوی نینگ دېوارلری، اېشیک - دیره زه لری هم تیترب ییغلردی، گؤیا.

اېرککلر اېچکری گه کېلیپ، نورآی نینگ جنازه سینی کؤترگن زهاتی، عیالرنینگ ییگی و داد و فریادلری شو قدر کؤته ریلدی که، عیناً قیامت و محشر صحراسینی اېسله تردی.

نورآی نینگ آنه سی قتیق فریاد چېکیب دېدی:

- وای، مسلمان لر ... اېرکه قیزیم نی.. آلیب کېتمنگلر... قؤیینگلر... دیدارینی کؤریب تۆیه ی! یا تنگ ریم،... قیزیم سیز قنداق یشه یمن؟ ... خدایا ... مېنینگ جانیم نی هم آل... باشقه چیدالمه - یمن.

نورآی آنه سینینگ تاووشینی باشقه عیالرنینگ ییگی - سیغیسی باسدی. برچه لر ییغلردی، برچه لر فریاد چېکردی و داد و واویلا قیلردی. بونده ی قیغولی سېس لر قولاغیم گه چلینیب، بوتون وجودیم نی قمره ب آلیب، برچه تامیرلریم نی تیتره تردی.

جنازه نی کؤته ریب، آلیب کېتدیلر. برچه عیال لر ییگی - سیغی قیلیب، جنازه آرتیدن قویی قېت و حتی که کؤچه گچه باردیلر. اېرککلر لرنینگ مانع لیکلری فایده سیز اېدی. نهایت، اېرککلر بوتون

وجودلارنى درد - قىغو قمرەب آلگن ھىجانلى عياللارنى زۇرغە ايچكرى گە سورىب، بىرىنچى قېت نىنگ كىرىش اېشىگى نى آرقە دن بېركىتىلەر.

مېن اۋرنىمدن قۇزغلمەدېم. آياقلىرىم اويىشىپ قالگن تەنەمنى كۈتەرىپ تورىش گە كوچسىزلىك قىلدى. اۋزىمنى قندەى دىر، تار و قرانغو بىر فسادە، آغىر ھوانىنگ باسىمى آستىدە سېزردىم. قندەى دىر، نامرئى قۇللر بۇغزىمنى بۇغگن دېك توپولردى. نفس آلىشىم قىين بۇلگن اېدى. بىرچە نرسەلر كۈزىم گە خىرە- شىرە كۈرىنردى. اېندى مېنىنگ ھالىم شوندەى بۇلسە، خدا بىلسىن، نورأى نىنگ المزدە آنەسى قندەى احوالە دىر، دېگن اۋى كۈنگىلىم گە كېچدى. نورأى نىنگ آنەسى اۋلتىرگن تامانگە باقدىم. او، ھالدىن كېتىگن اېدى. خودى اۋلىك دېك رىنگى اوچىپ، آقەرىپ كىتىگن اېدى.

آياق لريم مېنى كۈتەرالمىدى، شۇنىڭ ئۈچۈن سېكىن - سېكىن سىلجىپ، زۇرغە ئۈنىڭ يانىگە باردىم. باشى ئۈڭ يېلكە سىگە اېگىلىپ قالگن و آياق مڭلەيىدە ساووق تېر تامچىلىرى يىلتىزەب كۆرىنەر اېدى. باشدە ئۈنى پىستراق، كېيىن بىلندراق تاووش بىلەن قىچقىردىم. وجودىدە ھېچ قندەي ھىركەت كۆرىنمىس اېدى. تىرىك اېكىنىي بىلردىم، چۈنكە بىنى ساووق بۇلسە ھم، بىراق مڭلەيى و قولى نىڭ كفىدن ساووق تېر قىقردى. سېكىن و اوزىق - اوزىق نىس آلسە - دە، ئۈنىڭ وجودىدە ھايات بىلگىلىرى سىزىلدى.

برچه اورینیش لریم ضایع کبّدی. باشقه عیالرنی یاردمگه چارلهدیم. هرکیم اؤز بیلگنیچه و قوئیدن کبّلگنیچه مصلحت ببری، یاردم کؤرستدی، اما هیچ قندهی فایده بېرمه دی. داکترنی چقیریب کئلماق اوچون بوتون آپارتمان لرده بیرارته ابرکک قالمه گن

اېدى. برچە اېرككلر، نامراد قىز نىنگ جنازەسىنى اۇقىش، سۇنگى يۇلگە كۈزەتىش و دفن مراسىمى گە كېتىگن اېدىلر. عىاللارنىنگ اويدن تشقىرى چىقىش گە حقلىرى يۇق اېدى، چونكە محرمسىز تشقىرى گە چىققن عىاللارنى، شلاق و آغير جزا كوتردى.

عىاللار نىنگ ھېچ بىرى تشقىرى گە چىقىش گە جرأت قىلالمە- دى. كسل نىنگ حياتى قىل اوستىدە و داکتر نىنگ ياردىمى جودە كېرە- كلى اېدى. بو بېجارە عىال نىنگ اۋلىب قالىشى دن قۇرقىب، ناچار يوز يورەك نى بىر قىلىب، چادىرىم نى باشىمگە سالىب، كۈچە گە چىقىدىم. كېلە ياتىگن تاكسى گە قۇل كۈتەرىب، تاختىدىم و يلىنىب، يالوارىب، اونى نورأى نىنگ اويىگە آلىب كېلدىم. عىاللار ياردىمدە نورأى نىنگ آنە سىنى زۇرغە تاكسى نىنگ آرقە اۋرىنى گە ياتقىزدىم.

بو زماندە ھېچ بىر عىال، ھىداۋچى يانىگە اۋلتىرىش گە جرأت قىلالمس اېدى، نېگە كە بو عمل منع اېتىلگن و اونگە پروا قىلمەگن كىشى گە آغير جزا تعين لنگن اېدى. شونىنگ اوچون تاكسى نىنگ كېينكى اۋرىنى دە مېنگە جاي بۇلمسە ھم زۇرغە اۋزىمنى جايلىب، نورأى نىنگ آنەسىنى كسلخانەگە آلىب باردىم. ساعتلر كوتىدىم، بىراق او، ھوش گە كېلمەدى. كېچقورون شام پىتى دە نورأى نىنگ آتەسى بىلن اويغون جان كسلخانەگە كېلدىلر.

نورأى نىنگ آتەسى قىرىب، شۆشَب قالگن اېدى. قىزى نىنگ اۋلىمى و خاتىنى نىنگ كۇما گە توشگنى اونى جودە ھم سىندىرىب، حالدن تايديرگن اېدى. بېجارە گېيرىش و آياققە تورىش گە اصلا كوچى يۇق اېدى. اونى يۇپەتىش ناۋرىن بۇلسە ھم، بىر نېچە آغىز سۆز اونگە آيتب، اۋزىمچە تسلى بېردىم. او اېسە، دېوارگە تىكىلگن

كۆزىنى دېۋاردىن اوزىب، مېنگە بىر قيا باقدى- دە، كېين قىتېب قرشى سىدەگى دېۋارگە تىكىلىپ قالدى.

مېن اونىنگ ياشلى كۆزلىرىدە، اۋشە بىر قيا باقىشىدە بىر عالم قىغو - دردىنى كۆرىپ، اونى يوپەيتىشدىن پشيمان بۇلدىم. او يېر دە بىز اوچ كىشى بۇلسك-دە، آرە مىزدە آغىر جىملىك حكىم سورردى. بو كوتىلمەگن قىغولى واقعه، بىز اوچ كىشىنى بىر خىل توىغو رشتەسى بىلن باغلهگن ابدى. بىزىنىڭ اۋرنىمىزدە جىم-جىتلىك سۆزلردى. بىز كۈنگلىمىزدەگى آغىر قىغونى بىر- بىرىمىزگە قرەمەى، ھېچ قندەى سۆز اىتمەى سېزردىك و سۆزلردىك.

كسلخانە نىنگ انتظار يۈلكى دە چراغ ياقىلدى و قرانغولىك پردەسى ياروغلىك يوزىنى ياپگىندىن خبر بېردى. چراغ نىنگ ياروغلىكى اۋرتە مىزدەگى جىملىك پردەسىنى كۈتردى. اويغون جان اۋرنىدىن تورىپ، نورآى نىنگ آتە سىگە ايتدى:

- آغا صاحب، تورىنگ اويگە كېتەيلىك. بو كېچە قوم- قرىنداشر سىزىنىڭ اويىنىڭىزدە تۈپلنگنلر. بو يېردە اۋلتىرىش و كوتىشدىن فايده يۇق. سىزىنىڭ اويده بۇلىشىنىڭىز شرط. يا اېرتەلب والده دن خبر آلە مىز يا كە بو كېچە بىرار كىشىنى اويدىن بو يېرگە بىبارەمىز. كېلىنگ كېتەيلىك، كېچ بۇلدى، كېين مۇتر تاپىلمەيدى.

نورآى نىنگ آتە سى آنگسىز كىشى دېك اۋرنىدىن توردى. او ھېچ بىر نىمە دېمىسدىن، كسلخانە نىنگ اېشىگى تامان گە سېكىن ادىم تشلەدى. اويغون جان اېسە، آلدىنراق بارىپ، كۈچە گە چىققونىمىزچە بىر تاكسىنى تاختىگن اېكن. بىز تاكسى بىلن اولل اونى اويگە يېتىشتىرىپ، كېين اۋزىمىز اويگە قىتدىك.

اويده باله لريميز پريشانلىك بيلن بيزنى كوتىب تورگن  
 اپكن لر. اولرنيگ سۇراقلىرى اداغ سيز ابدى. اويغون جان جيم ابدى و  
 مېن هم اصل واقعه دن هېچ نرسه بيلمىس ابدىم، شو باعث، اولرنى بىر  
 عملل ب جيم قيلدېم. كېچكى يېمكىنى يېب، دسترخوان نى يىغىب  
 تورگنېم ده اويغون جان ياتاقخانه گە كىرىپ كېتدى. قىزىم گە ايدىش  
 لرنى يوويش نى بويورىپ، ياتاقخانه گە كىردىم و اويغون جان دن  
 سۇره دىم:

- اويغون جان، مېن يوز بېرگن واقعه دن هېچ  
 نېمه نى بيلمە دىم. نورأى تۇرتىنچى قېتىن قويى گە يىقىلگن مى يا  
 اۋزىنى تشلەگن مى؟!

اويغون جان يوواش آيتدى:

- قۇشنى لرى، او اۋزىنى تشلەگن، دېب آيتە دىلر.

تعجب بيلن سۇره دىم:

- نېگە اۋزىنى تشلەگن؟ او، شونچە شۇخ و قووناق و  
 شونچە خوش چىقق و بېغم كۇرىنردى كە، اصلا اۋزىنى اۋلدىرگنى گە  
 ايشانگىم كېلمەيدى.

- اونى سۇنگى بىر آى ايچىدە كۇرگن ابدىنگىز مى؟

- يۇق. قىرىپ ايكى آى دن بېرى اويىمىزگە كېلمەگن

ابدى.

- قۇشنى لرى نىنگ آيتىشىچە، بىر آى بورون يوزى

آچىق بالكن گە چىققن اېمىش. اۋشە زهاتى طالبلىرىنىگ بىر ملا امامى  
 اوى لرى نىنگ آلدىدن اۋتر اپكن. امام نىنگ كۇزى نورأى گە توشىپ،  
 آلتمىش ياشر بدبخت ملا بو ياش قىزگە كۇنگىل بېرىپ، ساوچىلىككە

بارىدى. قىزىنىڭ بېچارە آتە- ئانە سى كۆپ غىر و بېھانەلر قىلىپىدىلر، بىراق فايده قىلمىدى. شۇندە بو ملا اوزى نىڭ كوچلى طالب اورتاقلرى ياردىمىدە نورآى نىڭ آتە سىنى قماققە آلىپ، كېل بىلن اوريپ، ھفتە نىڭ سۇنكى گچە مثبت جواب بېرمىسنگ، اۇزىنگ و بالەلرىنگى اۇلدىرەمن، دېب تھديد قىلىدى.

نورآى بو واقە دن خبر تاپىپ، بېرىلگن مھلت توغشى بىلن اۇزىنى تۇرتىنچى قېتىن قويىگە تشلب، اۇلدىرىدى. آغا صاحب، قىزى نىڭ نمازجنازە سىنى اۇز مسجىدلىرىدە اۇقىتمەى اوزاقىدەگى مسجىدگە آلىپ بارىپ اۇقىتىدى.

اويغون جان نىڭ آيتگن سۇزلىرى مېن اوچون جودە آغىر و قىغولى اېدى. ۱۸-۱۹ ياشلى گۇزەل نورآى جودە استعدادلى و بىلىملى اېدى. او، چىرايلى شەرلر آيتىپ، يىخشى حكايلەر يازدى. او، كىتابنى سېوردى و كۆپ اۇقوردى. او، اۇزى نىڭ اۇلىمىنى، آتە- ئانەسى و اكە- اوكلەلرى نىڭ اۇلىمى دن يىخشىراق بىلىپ، اۇلىمنى قىرى طالب امامگە اويلەنىش دن افضل بىلدى.

نورآى اۇز اۇلىمى بىلن در واقع عياللر اېركىنلىگى شىعارىنى كويلەگن اېدى، زىرا عياللرنىڭ بىرچە حق- حقوقى آلىنگن جامىدە ھىم اۇزىنى اۇزى اۇلدىرىش حقىنى كىشى آلامەيدى و نورآى افسوس كە انە شو حقىدن، ناتوغرى يۇل بۇلسە ھىم، فايدهلنگن اېدى!

قىتق باش آغرىق و تورلى اۇيلر بىلن تۇشككە يىقىلدىم. قنچە قىزلىرىمىز نورآى نىڭ تقيدىرىگە دچار دىرلر؟ قچان گچە بو بېداد دوام اېتەدى؟ نورآى اول اۇشە نامىسلان ملامام نى اۇلدىرىپ، كېن اۇزىنى اۇلدىرسە بۇلمىس مىدى؟ اگر نورآى اۇزىگە اۇخشىش بىر نېچە قىز و عيال

بیلن خیابانگه چیقېب، خلقارا رادیولر بیلن صحبت اؤتکزگنیده، اونینگ تقدیری باشقه چه بؤلْمس میدی؟ آیا باشقه خاتین- قیزلر اؤزلریگه اوندن حمایت قیلش جراتی نی تاپر میدیلر؟

تورلی جواب سیز سؤراقلر و یېچیم سیز معمارلر بیر یاقدن و اؤشه کونگی ییغی- سیغی لر باشقه تاماندن میه و تنیم نی شونچه لیک اېزېب، مېنی شونچه لیک خالدن تایدیریب، چرچتگن اېدی که، فقط تینچ و آغیر بیر اویقو مېنی اؤز حالیمگه قیتهره آلردی. بېاختیار کیپرېک لیریم بیر- بیرى اوستیگه توشیب، سؤراقلرنی تکرارلش و صحنه لرنی اېسلش بیلن اویقوگه کېتدیم.

توشوم ده کابل شهرى نینگ قلبی یعنی زرنگار پارکیده تورگن اېکن من. تېگره گیمده هېچ نرسه یۇق. برچه یېرلرنی چنگ- تۇزان باسگن. جیم- جیریت. هېچ قندهی سېس اېشیتیلْمه یدى. یکه و یالغیز تورېب من. بوتون وجودیم نی قورقوو قمره ب آلگن. هرتامانگه یوگوره من، اما آیاقلریم ایزیدن کؤته ریلگن چنگ دن اؤزگه بیرار نرسه یا کیشی مېنی همراھلیک قیلْمه یدى. بیرارته نی آت توتوب چقیرماقچى بؤلْمن، بیراق برچه آتلر اېسیمدن چیققن، فریاد چیقھریب، شاوقین سالماقچى بؤلْمن، اما تاماغیمدن هېچ بیر تاووش چیقْمه یدى. یوگوریب، یوگوریب، چرچه- یمن. آیاقلریم کوچسيز بۇلیب قالگن. آیاغیم بیر نرسه گه تېگیب، مودره ب ییقیلْمن. قره سم، آیاغیم تېککن نرسه قبر تاشی اېکن. ینگى دن بدنیم نی قورقوو حسی قاپلے یدى. بوتون یان- اطرافیمده فقط قبرلر و قبر تاشلر کؤزگه تشلْنه یدى. قبر تاشلرنینگ آیریم لریگه خط لر یازیلگن و بعضی لریدن اېسه خط لر اؤچیب کېتگن. اؤرنیمدن تورماقچى بؤلْمن، بیراق تۇستدن آیاغیم تگیده یېر بۇشْب کېته یدى. توبسيز قودوققه قولب

توشىب كېتە بېرە من، اما قودوق نىنگ توبى گە ھېچ ھم يېتىپ بارالمە-  
يىمن. بو قرانغولىك و بۇشلىككە توشىب كېتە ياتگىنەن دن قنچە دىقە  
اۋتگىنىنى تخمىن قىلالمە يىمن. قۇرقوو بوتون وجودىمنى  
قمرەب الگن. بو بۇشلىك و قرانغولىككە، ققشتگىچ ساووق ھم قۇشلىپ،  
بدىمنى موزلتەدى. تامىرلىرىم دەگى قان ھم موزلب قالگن گە اۋخشە-  
يدى.

كوتىلمەگندە بۇشلىق دە معلق بۇلىپ، تاختب قالەمن. آياغىم  
استىدە ھېچ قندەى تەينچ يوق. فقط قرانغولىك و بۇشلىك. نجات  
ايلنجىدە يوقارىگە قرەيىمن، خىرە ياروغلىك كۇرىنەدى. يورگىمدە بىر  
اميد كورتگى يشنەب، آچىلەدى. قووانىب اۋىلەى من:

- انە، يىخشى بۇلدى! باشقە پستگە توشمەى تورىبىمن، بلكە  
بىرار نرسەگە ايلىنىپ قالدىم مى؟ يوقارىدە ياخىلىك. مېنى قوتقەرىش  
اوچون بىرار كىشى تاپىلشى ممكن ...

بىردىنگە قندەى سېكىن - سېكىن قوبى گە توشىب كېتگن  
بۇلىسم، شوندەى سېكىن - سېكىن يوقارىگە كۇتەرىلەمن. كۇنگلىم اميد  
و قووانچ دن تۇلىپ، قىش كونى نىنگ مەربان قوياشى دېك بوتون  
وجودىم نىنگ موز-قارلىرىنى يېرىتىپ، ايسىتەدى. قنچەكە يوقارىگە  
كۇتەرىلىسم، اۋشنىچە ياخىلىك كۇپەيەدى. بىر پىت كېلىپ، ھمە ياق  
ياختى بۇلەدى. بۇشلىك و قرانغولىكدن چىقىپ، ياخىلىك و تەينچكە  
يېتەمن. آياغىم قىتىق يېرگە قۇيىلگچ، يورەگىم تىنچلىنىپ، ددىل بۇلەمن.

يوزىمنى اۋنگ تامان گە اۋگىرەمن. نورآى تورىيدى. اونىنگ  
قۇلىدە آق چىزىقلى كۇك بىراق. سۇل تامانىم گە قرەيىمن، كۇپ خاتىن-  
قىزلر تورگن. اولرىنىنگ لىبارىدە ظفر و ايشانچ تېسمى گگلب تورگن.

باشیمنى ارۋە گە اۋگيرەمن. آە، خاتىن - قىزلارنىڭ قندەى اولكن يىغىنى!  
 وجودىمدە ايشانچ و كوچ حسى توغىلىب، اولغەيەدى. آياقلىرىم قنچە  
 كوچلى و مستحكم دىر!

ينە نورآى گە باقمەن. قنچە لر شاد و ابركىن دىر! كۈزلرىدە  
 قووانچ و ظفر نورى پارلىدى. تۈستدن اونىڭ قووانچى مېنگە ھەم يوقە -  
 دى. اۋزىمنى شاد و ابركىن سېزەمن.

نورآى قرشى گە اشارە قىلەدى. اونىڭ اشارەسى آلغە بارىش  
 معننى سىنى انگلەتەدى. حالىگچە آلغە باقمەگن اېدىم. آلغە باققن يېتىم دە،  
 قاچەياتگن بىر گروە قارە كىملى لرنى كۈرەمن، آيرىم لرى نىڭ سلەسى  
 آچىلىب، كىر ساچلىرى شمال چىنگالى گە توشگن. آيرىم لرى نىڭ آياق  
 كىيىملىرى اېچىلىپ، آياق يلىڭ قاچماقدە.

ينە نورآى تامانىگە باقمەن. اونىڭ تېسىمى ظفرلى و نگاھى  
 اېسە ايشانچ، اميد و توگنمس كوچ نى گودەلنتىرەدى. اونىڭ مغرور  
 قامتى، ارادە سىنىڭ محكم ليگىدن سۈزلىدى. آغىز آچىب، بىر نىمە  
 سۈرەماقچى بۇلەمن، بىراق او، تۈستدن نظرىمدن غايىب بۇلەدى. بقىرە -  
 من:

- نورآى، نورآى... جان قىزىم... قەيىرگە كېتىدىڭ... قىت،  
 قىت!

بىر قۇل مېنى قىمىرلىتىپ، قولايىم گە بىر سېس چىلىندى:

- توركان... توركان جان ... تورىڭ، كېچ بۇلدى!

كۈزلىرىم نى آچدىم. اويغون جان تۈشكىم يانىگە اۋلتىرگن و  
 مېنى قىمىرلىتماقدە اېدى. اونگە:

- سلام ... نېگە مونچە وقت اويغاتدىڭىز؟ نىمە گپ؟ دېدىم.

او ناراحتلىك بىلەن دەدى:

- تورىنگ، فاجەئە تەكمىل بۇلدى!

مېن، تونكى اويقو و توشلرېم تائىرى آستىدە، توناكونكى  
ماجرالرنى اېسدن چىقارگن بۇلسم كېرەك كە تەجب بىلەن سۇرەيمەن:  
-نېمە؟ قىسى فاجەئە؟!

- شو حاضر نورأى نىنگ آنە سى وفات اېتگن دېب، خبر  
بېردىلر. داکترلرنىنگ آيتگن لىچە، روحى فشار و قىغو اونىنگ مېە سكتە  
سىگە سبب بۇلىپ، كوما دن چىقمەي جان بېرگن.

بىلمەدېم اۈزىمدن مى، اويغون جان دن مى، بىرار  
كىمسەدن مى يا كە يرهتگن دن مى سېكىن سۇرەيمەن:

- بوندى فاجەئە لرنىنگ سلسلە سى قچان گچە  
دوام اېتركن؟

# فاجعه

بیر پرده‌لیک نمایشنامه

### صحنه دکۆری:

بیر غریبانه اتاقده: اېسکیرگن گلیم، نېچه کۆرپچه و یاستیق، بیر عادی چپرکت، بیر میز و چوکی، میز اوستیده تیکوو ماشینی، اطو، قیچی و ایپ-ایگینه قطیچهسی، دېوار ده تیکیلگن و خامکۆک قیلینیب آسیلگن هرخیل کییملر.

**زمان:** توشدن کپین ساعت ایککی - اوچ لرده

### پرسوناژلر:

اییک (٩-١٠ یاشر قیزچه)،

٥٠-٦٠ یاشر عیال (قپین آنه و بیبی)،

اینجو (٣٠-٣٥ یاشر کپلین)،

آیدین (شو یاشده گی قۆشنی عیال)

**ایفیکت:** اوزاق و یقین دن اېشیتيله دېگن پارتلش لر تاووشی،

آمبولانس، موتر و مردمنینگ غله-غاوور و ییغی - فریادلری تاووشی.

اتاق دە، كۈرپچە اوستىدە بوكىلگن حالدە تۈز چوكىيىپ، كىتاب يوزىدىن اوى تاپشيريغىنى كىتابچەگە يازەياتگن قىزەلاق كۈرىنەدى. اونىنگ اونغ تامانىدە، باشقە بىر چەتدە اۋرتەياشلى بىر عىال كۈزىگە عىنك تاقىپ، تۈزەسى اوستىگە بىر كۈنگلكنى آلىپ، چلە قالگن جايلرىنى قۇل بىلن تىكماقدە.

بىر نېچە لحظە جىم-جىتلىك حكىم سۈرەدى. كېيىن اىپك (قىزچە) باشىنى كۈتەرىپ، اعتراضلى بىر آهنگ بىلن بى-بى سىدىن سۈرە-ىدى:

- بى-بى جان، نىمە قىلىپ اۋلتىرىپ سىز؟

بى-بى: اۋتگن كېچە آنەنگ تىككن كويلكنى قۇل بىلن تىكىلە-

دىگان جايلرىنى تىكەمن، اىپك جان!

-قۇيىنگ، قۇيىنگ، بى-بى جان! آنە جانىم كېلسەلە، اۋزلىرى

تىكەدىلە.

- ايىك جانيم دن اۋرگىلەي. سېن ھم خوددى آنەنگ دەي مەربان سە- دە! سېن دەي نېرەم بارلىگى دن خداگە شکر. آنەنگ بېچارە قىسى ايشنى اول راق قىلسين؟ اېرتەلب وقتلىك اېشىگە كېتىپ، شام بازار دن سودا- ساتىق آلب كېلسين مى؟ اوى نى توگە مەيدىگان ايشلر نى قىلسين مى؟ بىر نېچە پول اوچون يريم كېچە گچە مردمگە كييم تىكسين مى؟ سېنگە درس بېرسين مى؟ اونی ايشى بىرتە- ايکكى تە اېمس- کو!

- مکتبلە رخصت بۇلدى- کو! آنە جانيم نى اۋزلىرى مېنى قۇيمەي درس بېرەدىلە و ھر کون اوى تاپشیریغى بېرىپ، يەنە سۇرەگن- لرى سۇرەگن!

- مکتبلە اچىلىپ تۇرسە، آنەنگ بىر از سېندن خاطر جمع بۇلىدى. بو اوروشلە و راکتلە اوچون مکتبلە ھم ياپىلدى. آنەنگ سوادسىز قالیشینگدن قۇرقەدى، قىزگىنەم.

ايىك جايىدن تۇرىپ، بىبىسى تامانگە بارەدى و تىكىپ اۋلتىرگن كييمى بىبىسى نىنگ قۇلىدن تارتىپ آلب، بىبىسى نىنگ اعتراضى گە قرەمەي اونی تىکوو ماشینی اوستیگە قۇيەدى. قىتب بارىپ، اۋز جايىگە اۋلتىرەدى و يەنە اعتراض يىلن:

- آنە جانيم نى اۋزلىرى، كۇزىنگىز خىرەلشىپ قاليدى، تىكىش سىزگە ضررلى، دېپ ايتىدە- کو!

- بېچارە آنەنگ كۇپ مەربانلىگى اوچون مونداغ دېدى، جان گىنەم! اونگە قرەب يورەگىم اېزىلىپ كېتەدى. ايشنى كۇپلىگىدن و غم- غصەلەدن كوندن كونگە سرغەيىپ، قىل دەي ضعيفلشىپ كېتىدى. كسل بۇلىپ قالمەسین، دېپ قۇرقەمن.

(بی بی اۋرئیدن توریب، ماشین اوستیدن اۋشه کۈنگلک نی آلیب  
ینه تیکه باشلهیدی)

- بی بی جان!

- هه، قیزه لاغیم؟

- آنه جانیم بیران کبچه کبچه اۋلتیریب دعا اۋقیدیله، بیران  
کبچه سبس لرینی چیغرمه ی بیغله دیدله. کبین مبن اویغه نیب کبتسم،  
اۋز لرینی اویقی گه ساله دیدله. حتی اولردن سۋره سم هم یاتیب قالگن آدم  
ده ی جواب بېرمه دیدله. نیمه اوچون؟

- آه..! خدا خواهله سه، کته بۋلسنگ، اۋزینگ بیله سن.

(ایپک جاییدن توریب قۋلینی بېلیگه قۋییب)

- منه، حالی هم کته من. آیتینگ-ده!

- هه، خداگه شکر. کته قیزچه بۋلیب قالیبسن. (بیر نېچه لحظه  
سکوت ییلن ایپکک تیکیلیب قره ب) آتهنگ اوچون دعا قیله دی. بیغله-  
گنی هم آتهنگ اوچون دی-ده.

- آتهم هیچ یادیم گه کېلمه دیدله. آتهمنی کۋریب من می؟

- آتهنگ کبتیب قالگن ده، سبن اوچ یشر کیچکینه قۋغیرچاق  
اېدینگ. کبتگنی گه قریب یېتتی ییل بۋلدى.

- نیمه اوچون قیتیب کېلمه دیدله، بی بی جان؟

(بی بی آسمان گه قره ب، بیر قۋلینی خدادن  
سوره گندېک قیلیب) خدانى اۋزى بیله دی... کاشکی تېزراق قیتیب  
کېلسه بدى و آتهنگنى شونچه غم و محنتی کم بۋلسه بدى... (بیر آز  
اچىغى چیققن دېک) بیلمه یمن که او یېرده نیمه قیلیب یوریدی، ناانصاف!

نى گل دەى قىزىنى اېسلەيدى، نى فرشتە دەى خاتىنىنى. حتى كە  
اويالماهى مېندەى ناچار آنەسىنى ھم اېسى دن چىغرگن گە اۋخشەيدى.  
(شو وقت دە اوزاق دن پارتلىش تاووشى اېشىتىلەيدى. ائىك  
اۋچىب توشىب، بى-سىنىنگ قوچاغىگە بوسىنەدى و تىتراق تاووش  
بىلن)

- انە! ينە راكت توشتى. اې خدا جان! آنە جانىم ھالى قىيردەلە؟  
- آنە جانىنگ ھە دېمەى ساغ-سلامت قىتىب كېلەدى. قۇرقمە  
جان گىنەم. مېن آلدىنگگە مەن-كو!  
- بى-بى جان، مېن قۇرقمەن. مېنى قىتىق قوچاغلىگ، مېنى  
يشىرىنگ!

- قۇرقمە، جان گىنەم. خدا نى اۋزى اسرەسىن.  
(كېىن چارزانو اۋلتىرىپ، ائىك نىنگ باشىنى اۋز  
تەزەسىگە قۇيە تورىپ)

-باشىنگىنى تەزەم گە قۇي. كۈزىنگىنى يۈم. مېن سېنگە بىرتە  
شىرىن گىنە مەل ايتىپ بېرەمەن. كۈزىنگىنى يۈمسىگ، مەل دەگى جاي-  
لە و آدم لرنى آلدىنگگە تورگن دەى كۇرالەسن.

(بى-بى كۈزىدن عىنكىنى آلىپ، دىستەلرنى اىچكىرىگە قىتە-  
رىپ، يانئىدەگى ياستىق اۋستىگە قۇيەيدى. كېىن ائىك نىنگ باشىنى  
يخشىراق جابجا قىلىپ، باشى و ساچلرنى سىلەى باشلەيدى. ائىك  
آياق لرنى يىغىپ، قۇلى نىنگ باش بىرماغىنى آغزىگە سالىپ، سۈرىپ  
باشلەيدى. بى-بى اۋنىنگ قۇلىنى اۋز قۇلىگە آلىپ)

- قۇرقسنگ، دررو برماغینگینی چقه لاق لردەى سۇرى بېرەسن!  
 ینە اۋزینی کتە قیز بۇلیب من دېیدی-یە! سېن کۈزینگىنى یوم، مېن  
 سینگە دریا پرىسى و پشیمان شاهزادە قصەسینی آیتیپ بېرەمن.  
 - ایتینگ، بى بى جان. (باشینی بیر آز کۈتەریب) اما آخرى  
 قىغولى بۇلمەسین، خى- مى؟

- (بى بى اوزون بیر آه چېکىب) اۋزیم قچان خوشلیک نى  
 کۈردیم که متل لریم هم خوشلیک و بخت دن حکایه قىلسە.  
 (ایپک کۈزینی یومەدى. ینە پارتلش تاووشى یقین راق مسافە  
 دن اېشیتیلەدى. ایپک قۇرقىب، کۈزلىرىنى کتە-کتە آچىب، باشینی بى-  
 بىسى نینگ تۈرەسىدن کۈتەرەدى و حیران و قۇرقاق، اول تماشچیلرگە،  
 کېین بى بىسىگە قرەیدی. بى بى اونی قوچاقلب آلەدى و ملایم تاووش  
 بیلن)

- قۇرقمە، جان گینەم. راکتله بو یېردن اوزاق-اوزاققە. بو  
 یېرگچە یېتیب کبالملە یدی.  
 (ایپک آیاغیدە تیک تۈرەدى، بیر آیاغى بیلن یېرنى تېپىب،  
 اضطرابلى تاووش بیلن) اگر آنە جانیمنى ایشخانە لریگە توشگن بۇلسە،  
 نیمە بۇلەدى، بى بى جان؟ آنە جان!...

(ایپک ییغلب ییبارەدى و اېشیک تامانگە یوگۈرەدى. بى بى  
 آرقەسىدن یوگۈرىب بارىب، اونی قوچاقلب آلەدى)  
 - قیرگە کېتەسن، ایپک جان؟ قیرگە؟ مېن یاش اېمس من که  
 ارقەنگ دن چاپالسم! کى، کى بو یېرگە یات.  
 - یاتمەیمن، آنە جانیمنى آلدلریگە کېتەمن!

-آنەنگ بو يېرگە يېقىن مى، آلدېگە چاپىب بارالسېڭ؟ آنەنگ  
ايشخانەسىگە كېتگن. ايشخانەسى اويىمىزدن كۆپ اوزاق.

(بى بى زۇرغە اونی تارتىب كېلتىرىپ، چىركت اوستىگە ياتقىزە-  
دى و اۋزى ھم اونىڭ يانىگە اۋلتىرىپ)

- شونداق راکت ياغىب تورگن وقتدە آنەنگ گە كېتماقچى  
اېدىڭ-؟ كۈچە دە بىر بلاگە اوچرەسېڭ، بېچارە آنەنگ، نې احوالگە  
توشەدى؟ بونى ھېچ بىر اۋىلەيسن مى؟

(اېپك يەنە اۋرنىدىن يىرىم تورىپ، بى بى سى قرشېلىك قىلگىدىن  
تورالمەي، ناچار چىركت اوستىگە اۋلتىرىپ، يىغى ارەلش آواز بىلن)  
-آنە جانىمنى آلدلىرىگە بارەمن. مېنى قۇيىبىرىڭ، آنە جانىم نى  
آلدلىرىگە بارگىم كېلاتدى.

(بى بى اونی سىلب-سىيىپ تىنچلتىرماقچى بۇلەدى و تسلى  
بېروچى تاووش بىلن)

- بو راکتلە ھەر كۈنى ھەر جايگە توشىپ تورىيدى-كو! بولرگە  
اۋرگەنىپ قالىشىڭ كېرەك اېدى. سېن دايم قۇرقىپ، مېنى قوچاغىمگە  
كىرىپ، متل لىرىم نى اېشىتىپ، ياتىپ قالىيىدىڭ. بو گۈن ھەر وقتدن  
ھم كۇپراق قۇرقاڭدىڭ. يەنە آنەمنى آلدېگە بارەمن، دېپ كۈچە گە  
چىغماقچى بۇلگەنىڭ نىمەسى؟ مونداغ وقتدە اويدن چىغىپ بۇلەدى  
مى؟

-آنە جانىم چىغىپ كېتگنلە-كو!

- آنەنگ مجبورلىكدن چىغەدى. ايشگە بارمىسە، بىر اغىز نان نى  
كىم بېرەدى؟ يەنە او، كۈچە دە اېمس-كو! ايشخانە سىدە، بىران پەنەراق  
جايدە اۋزىنى آلىپ تورگن دىر-دە. ھى، بو بى انصاف آنەنگ گە خدا نى

اۋزی انصاف بېرسین-ده! اگر او بو یېرده بۆلسهیدی، یا که بشقهلهدهی پول-مول یېبهریب تورسهیدی، آتەنگ هېچ هم ایشگه بارمیدی. اویگه اۆلتیریپ، مېن و سېنگه، اوی-رؤزغارېگه قېرب تورسه، بس اېدی. نیمه قېلهیلیک؟ آسمان اوزاغ، یېر قتیغ-ده! قۆلیمیز همه یاغدن اوزیلگن. خدا و آتەنگ دن بشقه پناھیمیز یاغ.

- آتەم نیمه اوچون کېتیتیله؟ کېتگنی قۆیمسه ییز بۆمیدی

می؟

- بۆمیدی-ده! آتەنگ ظالم لرنی قۆلیدن قاجیب کېتیش گه مجبور بۆلدى. اگر او، اۋز وقتیده قاجیب قوتۆلمسهیدی، خدا گه معلوم، بیر ایککی دۆستلری دهی او هم قماقغه توشیب، اۆلیب کېتی دیمی؟ خدا نی اۋزی، اونى هم اسرەسین و هم اونگه انصاف بېرسین-ده!

- صنفداش لیریم نی همه سینى آتەلری آلدلرېگه. اوله آتەلری مین بازارگه باره دیله، آتەلری مین درس اۋقیدیلە، یخشی کییم له کییه دیله. مېنى آتەم هم یاغ، یخشی کییم لیریم هم یاغ. آتە جانیم مېنى بازارگه هم آلیب بارمە یدیلە.

- پرى قیزیم، کۆپ سیقیلمه. خدا خواهله سه، یقین اره ده یا آتەنگ کېلیب قالەدی، یا سیزلرنی هم اۋز آلدیگه چقیریپ آلهدی. اۋشندە همه نرسه یخشی بۆلهدی.

- بی بی جان، اگر بیزلرنی آتەم اۋز آلدلرېگه چقیریپ آسهله، سیز کییم مین قالەسیز؟

- مېن ایندی قریب قالدیم. مېنگه هېچ کییم هېچ نیمه دېمه- یدی هم، تېگمه یدی هم. سېن و آتە جانینگ امان بۆلسه یله، مېنگه بس.

- ياغ. مېن سىزنى يىككە قۇيىپ، ھېچ جايگە كېتمەيمەن. آتە-  
مگە ايتەمن كە يا سىزنى ھەم بىزلە مېنن آلدلىرگە چقىرىپ آلسىنلە، يا  
كە اۋزلىرى آلدېمىزگە كېلسىنلە.

- مېھربان نېرە گېنەمدىن اۋرگىلەي. خى، بو گېلە اۋز وقتىدە  
بۇلىپ قالار. سېن ھالىدن بو بارەدە اۋىلب اۋلتىمە. نېمەنى كە خدا نى  
اۋزى خواھلسە، اۋشە بۇلەدى. ھالى سىنگە ايتماقچى بۇلىپ تورگن  
قەسەم دەي ھتى پادشاھلە و شاھزادەلە ھەم تەقدىر نى اۋزگرتىرالمەيدىلە.  
- ھە، قەسە نى باشلىگ، بى بى جان.

- شىرطى شوکە ھەر كۈنگى دەي كۈز لىرىنگى يۈمىپ، اوخلە-  
سنگ-دە.

- خى، بى بى جان. (كۈز لىرىنى يۈمىپ تۈرىپ) مەنە، قرەنگ؟!  
كۈز لىرىمنى ھەم يۈمدىم. باشلىگ-دە!

- (بى بى چىركەتنىن آياغىنى اوزەتىپ آلەدى. اىپكىنى ياتقىزە-  
دى، يۈزى تماشچىلەر و آرقەسى دېوار تماندە. قۇلىنى اىپكىنىگە باشىگە  
قۇيىپ، سېكىن - سېكىن سىلەپ باشلەيدى)

- بار اېكەن و ياغ اېكەن، قەدىم نى زمانىدە، ملكى نى امانىدە،  
كۈركەم و باتىر بىر شاھزادە يشەپكەن. كۈنلەردىن بىر كۈنى يۈرەگى  
سىقىلىگەندىن آتەسىگە بارىپ:

- اۋرتاغ لىرىم دايم سىفر قىلەدىلە، تۈرلى شەھەرلە و آدملىرى  
كۈرىپ، تەجرىبە آرتىرەدىلە. مېن اۋىدە اۋلتىرى بېرىم، اېرتەلىك كۈندە  
دولت ايش لىرىنى قىنداغ بىجىرالىمەن؟ اۋرتاغ لىرىم مېنن دريا سىياحتىگە  
رىخەست بېرىنگ، دېپ ايتىيدى.

پادشاه دريا خطر لرینی ايتیدی، اما شاهزاده کۈنمیدی. آخر پادشاه مجبور بۇلیب، بیر کبمه بېریب، شاهزادهنی برچه اۇرتاغلری مینن دریا سیاحتی گه جۈنه تییدی.

کبمه دریالرنی گېزیب، کۈندن-کۈنگه شاهزادهنی شهریدن اوزاقلشتیریپ کېتییدی. بیرکون دریا تۇلقونلنپ کوچلی طوفان باشله-نیب، کبمه گرداب گه اوچرەب، دریا توییگه چۈکیب کېتییدی.

(ایپک باشینی کۈتەریب، ایکی قۇلینی بیر- بیرگه قرس اۇریب): وای، بی-بی جان، شاهزاده و اۇرتاغلری غرق بۇلییدیله، می؟

- بی-بی: یاغ، سېن قۇلاق سالیب، گېیمنی ارەسیگه کیرمە ی تور. بۇلمسە اویقینگ اوچیب کېتەدی. قصه قییریگه ییتیب کېلگن ابدی؟ هه، شاهزاده و اۇرتاغلری تۇلقونلی دریا گرداییگه توشیب، بیرین- کېتین سووگه چۈکیب کېتییدیله. شاهزاده هم بیهوش بۇلییدی، اما سوو پری- لریدن بېریسی اونى کۈریب، سېویب قالیدی و شاهزادهنی قیرغاققه آلیب باریب، میسه اوستیگه یاتقیزییدی. شاهزاده هوشیگه کېلیب، قرەسە، نه کبمه بار، نه اۇرتاغلری! اۇرنیدن توریب، هر تمانگه نظر سالییدی و بیردنیگه سوو ایچیده چیرایلی پریگه کۈزی توشییدی و اوندن سورە- بدی:

- سېن، کیمسن؟ سوو ایچیده نیمه قیلیب توریبسن؟  
- پری فارم مینن آواز مینن: (بی-بی، پری تامانیدن سۇز لگنده اۇز تاووشینی مینن قیلیب سۇز لیدی) مېن دریا پریسیمن. سوو ده یشەیمین، دېدی.

شاهزاده: مېنى کبمه قنى؟ اۇرتاغ لريم قیپردە؟ مېنى کیم بو پیرگه کېتیردی؟ دېب سۇرەبدی.

پرى ايتىدى: كېمە و اۋرتاغ لرىز چۈكيب كېتىدىلر. مېن سىزنى قوتقەرىپ، بو يىرگە آلىپ كېلدىم.

شاهزادە قىغو گە باتىدى، اما آز وقتدن كېين، قارنى آچگىنى سىزىدى. هر يېرنى قىدىرىپ، هېچ يېگۈلىك تاپالمىدى. پرى سورەدى:  
- شاهزادە، نېمە نى اختەرەسىز؟

شاهزادە: قارىمىم آچ، بىران يېگۈلىك تاپەي دېپ قىدىردىم، اما هېچ نرسە تاپالمەدىم، دېدى.

پرى: صبر قىلىنگ. مېن حاضر دريا تويىدن سىزگە بىران يېگۈلىك آلىپ كېلەمەن دېدى و سوو گە شونىغىب كېتىدى. بىر نېچە دىقە دن سۈنگ، بىر شاخە مرجان نى آلىپ چىقىدى. شاهزادە كۈلىپ ايتىدى:

بو مرجان كو! اونى يېپ بۇلمەيدى.

پرى قىتە- قىتە سووگە شونىغىب، هر نرسە كېلتىرېكن، اما شاهزادە ھەمە سىنى رد قىلەپكن. آخر پرى تىكان لە آرە سىدن بىر تورلى مېوہ تاپىپ، كېتىرىدى. شاهزادە مېوہنى يېپ، تۇيىدى. تۇيىگەن دن سۈنگ، پرى نى قۇل لرىگە قرەدى. پرىنى قۇللرى يره بۇلىپ، قانى آقېكن.

شاهزادە موضوعنى سورەسە، پرى: بو مېوہ تىكان ارە سىدە اېكنلىگى و تېرگىدە قۇلىنى يره لنتىرگىنى ايتىدى.

شاهزادە: نېگە مېن اوچون اۋزىنگى عذاب بېردىنگ؟ دېپ سورەدى.

پرى آھ چېكىپ: كىچىك ليگىم دە، آتەم گە بىر فالچى مېن بىر شاهزادە گە كۈنگل قۇيىپ، اوندن بېوفالىك كۈرىپ، قىغودن ھلاك

بۇلىشىمنى ايتگن اېكن. مېن سىز نى سېويىب قالدىم. بىلەنمەن آخرى  
مېنگە بېوفالىك قىلەسىز و مېن بو الم دن اولەمن، دېب، زار- زار  
يىغلىدى. شاھزادە اونى بو مەر و مېتىنى كۆرىپ:

-ياغ، سېنى مېن ھەم سېويىب قالدىم. سېنگە بېوفالىك  
قىلمەيمەن، اما سېن قوروغلىككە و مېن سوو دە يىشالمەيمەن، آخرىمىز  
نیمە بۇلەدى؟ دېب سۆرەدى.

پرى ايتىدى: اگر يېتى يىل صبر قىلالەسىز، مېن آدمزادگە  
ايلنەمن. اۋشندە بىرگە بۇلىپ، بختىار حىيات كېچىرەمىز. اما اگر يېتى يىل  
اۋتمەي، بشقە گە اويلنەسىز، اۋلىپ قالەمن.

شاھزادە: يېتى يىل اېمس، يېتمىش يىل ھەم صبر قىلالەمن،  
دېب پرىنى ايشانتىرىدى. ھەفتە و آىلە اۋتتىدى. شاھزادەنى آتەسى ھەر  
تمانگە كېمە و آدم جۇنەتیب، اونى تايىپ، آلىپ كېتىدى. پرى يىغلب  
قالىدى و شاھزادە يەنە وعدەسىنى تکرارلەپ، مەھلت تۈگەمەي اونى آلىپ  
كېتىشىنى ايتىدى.

شاھزادە اۋز يورتى گە قىتىدى، اما پرىنى اېسلب، دايم غمگىن  
اېكن. شاھ و ملکہ اونى اويلنتىرماقچى بۇلىدىلە، اما شاھزادە، پرىنى  
سېويىشىنى ايتىپ، آلتى يىل مەھلت سۆرەدى.

اېندى آلتى يىل تۈگەيەنكەندە، بىر جادوگر، اۋزىنى پرى صورتى-  
گە ايلنتىرىپ، شاھزادە آلدیگە كېلىدى. شاھزادە الدەنىپ، اونگە  
اويلنىدى. تۈي كېچەسىدە، پرى واقەنى تۈشى دە كۆرىپ، قۇرقىپ،  
تۈشىنى آتەسىگە ايتىدى.

آتەسى: تقدیردن قاچىپ بۇلمەيدى. صبر دن بشقە چارەياغ.  
بىر نېچە كۈندىن كېيىن طلسم سىنەدى و سېن آدمزاد گە ايلنەسن. اگر

شاھزادە وعدەسىگە وفا قىلىپ، سېنىگە اويلنسە، بختلى بۇلەسن، اما اگر بېوفالىك قىلىپ، بشقە گە اويلنگن بۇلسە، غمدن اېزىلىپ، ھلاک بۇلە-سن، دېدى.

پرېپ تانگدن كېچقورون گچە دريا قىرغاغىگە بارىپ، شاھزادە نى كوتىدى، اما شاھزادە كېلمىدى. پرى، توشى چىنلىگىگە ايشانىپ، يىغلب- يىغلب سۇنگى بار شونداغ آھ چىكىدى كە اونىنگ آھى قلىن بۇلوت بۇلىپ، آسمان يوزىنى ياپىدى و ھمە جاي قرانغو بۇلىدى. شاھزادە الدەنىب قالگىنىنى بىلىپ، جادوگرنى اۇلدېرىدى و يۇلگە چىقىپ، پرى مىنن وداعلشگن جايىگە يېتىپ كېلىدى، اما افسوس كە پرىنى تىرىك تاپالمىدى. پرى يىغلب- يىغلب، يورەگى غم- قىغودن يارىلىپ، حيات دن كۇز يومگن اېكن.

(بىبى، بىر آھ چىكىپ، جىم بۇلەدى. اىپك اويغو سىرەب: «بېچارە آنە جانىم» دېدى و اويغوگە باتەدى. بىبىسى اونىنگ باشىنى اۇز تۈزە سىدن سېكىن گىنە كۈتەرىپ ياستىققە قۇيەدى و اۈز- اۈزى گە: -خىالچن بو قىزەلاق ھم ھر قصە نى اۈزى و آنەسىگە ارتباط بېرگنى، بېرگن. بو قصەنى آخرىدە ھم آنە سىنى تصور قىلىپ، بېچارە پرى گىنە دېمەى، بېچارە آنە جانىم دېدى، توبە! خدا نى اۈزى بو آنە و قىز نى اۈز پناھىدە اسرەسىن، دېدى.

(پارتلتش آوازى اوزاقراق دن اېشىتىلەدى. اىپك باشىنى كۈتە-رىپ، قۇرقوو بىلن)

-بىبى جان، بو گون كۇپ راکت كېلاتدى. مېن قۇرقاتدېم. آنە جانىم ھر كون شو وقت گچە ايشدن كېلەدېلە. بو گون نىمە اوچون كېمەدىلە؟

-آنە جانینگنی ایشخانەسی اوییمیزدن انچه اوزاغ. ینە او  
بېچارە سودا- ساتیغ آلیب کېلگنی بازار-آچارگە ھەم باریشی کېرەک. بېر  
کون وخت راغ کېلسە، بېر کون کېچ راغ کېلەدی. قۇرقمە، ایپک جان! ھە  
دېمەى آنە جانینگ کېلیب قالەدی.

-آنە جانیمنی ایشخانەلریگە راکت تېگمەیمی؟  
- یاغ، تېگمەیدی. خدانى اۋزى اسرەسین. آزگینە یاتیب  
تورسنگ، آنە جانینگ ھەم کېلیب قالە دی.

- بى بى جان، آتەم بو یېردە اېمس لە. آنە جانیمگە بېران نرسە  
بۇلیب قاسە، مېن و سیز نیمە قیلەمیز؟ کیم بیزلەگە قرەیدی؟  
- ایپک جان، مونداغ یمان نرسە لرنى اۋلیب اۋلتیمە. سېن  
حالى کىچكىنە قىزچە سن. حالى کولىب-اۋىنب يوریش وختینگ. خدا  
خواھلسە، آتەنگ ھەم کېلیب قالەدی یا ھەمەمیزنى اۋز آلدیگە چقىریب  
آلەدی. اۋشندە سېن، آنە جانینگ، مېن ھەمەمیز بېرگە بۇلیب، بختیار  
یشەیمیز.

(اېشیک تقيللەیدی. ایپک چاپیب اېشیک تامانگە بارەدی.  
قووناق تاووش بیلن:)

-انە، آنە جانیم کېلدى لە، آنە جانیم کېلدى لە.  
(اېشیکنى آچەدی. اېشیکدن قۇشنى یاش عیال کیریپ کېلە  
دی. بى بى اۋرنیدن توریب، مېھمانگە پېشواز چیقەدی:)  
-آیدین جان، کېلینگ، کېلینگ! خوش کېلدیز. منە کۆرپچە  
اوستیگە اۋلتیرینگ. ایپک جان، قنى خالە جانینگنى ارقەلریگە پشتىنى  
قۇى!

(ايپىك قوۋانپ، ياستىقنى مېھمان نىنگ آرقەسىگە قۇيەدى.  
مېھمان، ايپىك نىنگ يوزىنى اۋىپ:)

-ايپىك جان، قىنداغ سىن؟ كىتە قىز بۇلىپ يورىپ سىن مى؟  
-يىخى مىن، خالە جان.

-خالە جان، سىز قىنداغ سىز؟ كىسل اېدىز، ساغەيىپ كېتىدىمى؟  
رۇزگار ايشلىرى شونچە كۆپ كە ھەر كۈن بىر كېلىپ، سىزنى كۆرىپ،  
اينجو جان مىنن بىر-ايكى آغىز گېپىرىپ كېتەى دېيىمىن، اما اوى ايش-  
لرېدىن بۇشالمەى، كېلالمەيىمىن.

-آيدىن جان، سىز قىنداغ سىز؟ بالە لرېز، قۇنى - قۇشنى لرېز،  
قوم-قىرىنداش لرېز ساغ-سلامت يورىيدىلەمى؟  
-خىداگە شىكر. خالى گچە كۈنىمىز نى كۆرىپ يورىپمىز. بو  
راكتلەدىن امان قالسىلىك، بۇگنى.

-بو راکتله دم آگنى قۇيمەيدى-يە! ھەر كۈن بېش وخت نماز  
اۋقىپ، خىداگە سىغىنىپ، جىملە مۇمن مىسلماننى، اولر قىتارى اۋزىمىزنى،  
اينىقسە اېركەلدەى دايم كۈچەدە، ايشدە بۇلگن اينجو جاننى اسرەگىن  
دېب، دىقايلىمىن. قۇلىمدىن بىشقە نىمە ايش كېلەدى؟

-بىزىلەگە انە شو دىعالرېز بس. خالە جان، اينجو جان ايشدىن  
قىتمەدىمى؟

-ياغ، بو گۈن كېچ قىلدى. ھەر تىمانگە راکت توشىپ تورىيدى.  
كۈنگىلىم ناتىنچ. ايپىك جان ھىم بو گۈن ھېچ ياتمەى، آنەسىنى سۈرەگنى  
سۈرەگن. اونگە قىسە ايتىپ چىچەدىم، اما او راکتلىرنى آوازىدىن قۇرقىپ،  
ياتالمەى، آنەسىنى يۇخلەيدى.

- خاله جان، یوره گیم اینجو دوگانه م گه کویه دی. مونداغ یمان وخت ده ابرککله قۇرقیب، اویدن چیغمه یدیلە. او بېچاره بیر کون اویده اېمس. اچيغیز کېمە سین، اۋغلیز عار-ناموس لی اېمس اېکن. کیشی هم یاش خاتینی، کیچکینه قیزی و کسل آنه سینی شونداغ تشلب، کېته-می؟ اۋیله یمن که پول-مول هم ییبه ریب تورمه یدی. اگر پول ییبرسه-بدی، اینجو دوگانه م شونچه تلپینیب، تورلی ایش نی قیلیب یورمېدی.

- بيلمەدیم، آیدین جان. مېن بو احوال دن خوش من می؟ اینجو جان هم کېلینیم، هم مهربان قیزیم. او، مېنگه شونچه غمخۇرلیک قیلگن که اۋز قیزیم بۇلگنده هم، شونچه لیک قیلالمس اېدی. مېن اونی اۋز اۋغلیم دن کۋره کۋپراغ یخشی کۋره من. او ابری و قیزی مینن بیرگه بۇلیب، بختلی یشەسه، مېن قووانمە یمن می؟

- اۋغلیزگه خط یازیب، اونی وطن گه قیترسە یز بۇمە یدی می؟  
قچان گچە بو ابر-خاتین بیر-بیری دن ایریلیب یورەدی؟

- گپیز تۇغری. بو زمانەنی اۋغیل-قیزی آنەنی گپینی آلە می؟  
ینە مېن دە ی کسل و ناچار آنه کیم گه کېرەک؟

- خاله جان، مېنی کېچیرینگ. سیزنی خفه قیلماقچی اېمس اېدیم. فقط اینجو دوگانه م نی احوالینی کۋریب، یوره گیم اېز یلگنی دن شو گپنی گپیردیم.

- یاغ، قیزیم. سیزدن خفه اېمس من. اۋزیم سیز دن هم کۋپراغ اینجو جان و ایپک جان نی اۋیلب، بو ناتینچ احوالنی اۋیلب، کېچە لری اویقوم اوچیب، یاتالمە ی چیغمە من. منە، اینجو جان بو گون کېچ قیلدی، یوره گیم بیر قیلگە آسیلگن. نې اۋزیمنی چلغیتالە من، نې

ايپىك جان نى اوونتيرالەمن. نيمە قىلەي؟ يېر قتيغ، آسمان اوزاغ. قۇلىم  
ھەمە جاي دن اوزىلگن.

- خالە جان، راديو دن اېشىتتدېم كە اينجو جان نى ايشخانە  
سىنى يقينيگە راکت توشگن اېكن، شو اوچون ھم سۇرەگنى كېگن  
اېدېم.

- اى خدايېم، اينجو جان نى اۋزىنگ اسرە!  
- خالە جان، قۇرقمىگ. اينجو جان بو واقەدن آلدىن ايشخانە-  
سىدن چىققن دېر. ھالى كېلىپ قالر.  
(بېر چېتدە رسم چىزىپ اۋلتىرگن ايپىك، بو گپ لرنى اېشىتتېب،  
يىغلب)

-بى بى جان، قنى آنە جانېم؟ سىز مېنى الادەب، آنەنگ ھالى  
كېلەدى، دېگن اېدىز. آنە جانېم كېمەدىلە-كو؟! آنە جان...  
(بى بى و آيدىن يوگورىپ ايپىك نىنگ آلدىگە بارىپ، اونى يوپە-  
تىش و اوونتيريش گە كېرەدىلر. بى بى، ايپىك نى قوچاقلب آلىپ، باشىنى  
سىلب، يوزىنى اۋپىپ، ملايم سۇزلر بىلن تىنچلنتىرەدى. ايپىك يىغلب-  
يىغلب، ياتىپ قالەدى. آيدىن، اوخلب قالگن قىزچەنى قۇلىگە كۈتەرىپ،  
چىركت اوستىگە ياتقىزەدى و بى بى دن عذر سۇرەب اويدن چىقىپ كېتە-  
دى.)

-خالە جان، مېن بو يېرگە كېلىپ، سىز گە تسلى  
بېرەي دېگن اېدېم، واقە نى اېشىتتېب، اينجو جان نى ساغلىگى دن خبر  
آلىپ، كۈنگلىمنى تىنچىتەي دېگن اېدېم، اما كېلىپ، سىزلرنى تشوئش  
گە سالدېم. مېنى كېچىرىنگ، خالە جان.

-آیدین جان، بو تشویش- اضطراب له دایم بیز مینن بار.  
 مونگه سیز ملامت اېمس سیز. بو هر کونگی یمان واقعه لرنی تکراری.  
 فقط بوگون اینجو جان نی کیچ قیلگنی مېنی کؤنگلیمنی غش قیلیب  
 توریبیدی. همه نرسه خدا نی قۇلیده. اوزی اسره سه، بلا یاغ، اسره مسه،  
 دوا یاغ. بنده نی قۇلیدن دعا و توکل دن بشقه چاره یاغ.

-تؤغری ایته سیز. خدا نی اؤزی همه بنده لرینی، اولرنی  
 قطاریگه اینجو جان نی اؤز پناهیگه آلیب، هر قنداغ بلا- قضاله دن اسره-  
 سین.

-الهی آمین. ایتگه نیز کېلسین. خداییم سیز و عایله یز نی هم  
 ساغ-امان اسره سین.

-خی...اېندی، مېنگه رخصت. مېن اوی گه قیته یین.  
 -دوگانه یز نی کؤرمه ی کېته سیزمی؟ گپ مینن بۇلیب، سیز گه  
 چای هم کېتی مپمن. اېسیم قورسین!  
 -ای، چای حاجت اېمس. اینجو جانگه مېنی سلامیم نی ایتیب  
 قۇیینگ.

-کېگه نیز اوچون منتدار من، قیزیم. دایم کېلیب، بیزلردن خبر  
 آلیب تورینگ. اویده گی لریز گه هم بیزدن سلام ایتینگ.  
 -خی، خدا یاریز، خاله جان.  
 -سیز نی هم خدا یاریز، قیزیم.

(آیدین اویدن چیقیب کېته دی. بی بی اېشیک نی یاییب، ینه اؤز  
 جایگه قیتیپ، تیکیش نی قۇلیگه آلیب، اؤزی بیلن گېره باشلیدی):  
 - ای خدا جان، بو کیچکینه بېگناه قیزچه گه رحمینگ  
 کېلسین. او، آته مهرینی کؤرمه دی، اوروش ایچیده توغیلیب، اؤسدی.

اېندى اونى آنه مېرى دن اييرمه!... اي خداييم، سېنگە جان كېرەك  
 بۇسە، مېنى جانيم نى آل، اما نېبرە گېنەم نى بې آتە، بې آتە قىلمە.  
 اينجو نى شونچە يىخىشلىگى و مېربانلىگى اوچون ھر قىنداغ بلا-قضا دن  
 اسرە.

(بىر نېچە دىققە اۋتمەي، كوچلى پارتلىش آوازي جدا يقين دن  
 اېشىتىلەدى. بى بى اۋرنىدن تورىپ، ايپك نىنگ يانىگە بارىپ، اوندن خبر  
 آلەدى. ايپك بىر قىمىرلې، آه چېكەدى، اما اويقو دن اويغانمەيدى. بى بى  
 پست تاووش بىلن:)

خدا گە شكر، اويغانمەدى. خىريت بۇسىن، ھر بلا اېدى، شو  
 يقين يېردە اېدى. آه، اگر اينجو شو وقت دە كۈچە ميز دە بۇسە يا شو  
 راکت تېككن جايىنى يقىنىگە بۇسە، قىنداغ بۇلەدى؟ واى، واى... نىمە  
 قىلەي؟ قىزچە نى تشلې، كۈچەگە چىغەي مى؟ يا اونى يانىگە، اينجو نى  
 كېلىشى گە اميد قىلېب اۋلتيرەي مى؟... اي خدا جان، اينجو نى اۋزىنگ  
 اسرە!

(شو وقتدە اېشىك آچىلېب، اينجو پرىشان و غمگين اېشىكدن  
 كىرەدى. دستكولى نى شانە سىدن آلىپ، ديوارگە تېەنەدى. آياغى  
 بوكىلېپ، تىز چۈكەدى. اينجونىنگ كۈزلىرى قىزىرگن و كۈزىاشى كىپرىك-  
 لرىدە مىلتىرەپ تورگن. لىلرى قلىتيرەيدى و قۇل لرىنىنگ بى-اختيار و  
 مقصدسىز حرەكتلىرىدن، اونىنگ پرىشانلىگىنى بىلسە بۇلەدى.  
 بى بى بو احوالى كۈرىپ، شاشىلېپ، اونىنگ يانىگە بارەدى و  
 تشويشلى آواز بىلن:)

-سېنگە نىمە بۇلدى؟ رنكىنگ ھم اوچىپ، آقەرىپ كېتىدى،  
 قۇل - اياغىنگ قلىتيرەپ تورىيدى. كۈزىنگدن ياش آقاتدى. راکتدن

قۇرقدینگ مى؟ آوازى كۆپ بلند اېشيتلدى. ياووغمىزگە كېلىپ تېگدى مى، نېمە بالا؟ بېران چىرەسى بېران جايىنگ گە تېگدى مى؟ خدانى اۋزى اسرەسىن.

اينجو (يىغلب):

- كاشكى راکت كېلىپ مېنگە تېگسەبدى. كاشكى مېن ھم ھىسايلە و محلەداش لىرىمىز دەى اۋلىب كېتسەبدىم.

- خدا قىلمەسىن. آغزىنگىنى يىمان نىت مىنن آچمە. فرشتەلە آمىن دېمەسىن. خدا قد-قامتىنگ چە خىمچەنى سىندىرمەسىن. مونداغ وقتدە كىشى مونداغ يىمان نىت قىلمەيدى، قىزگىنەم.... راکت قەپىرگە تېگدى؟

- كۈچە مىزنى باشلەنىشىگە.

- سېن اۋشندە قە يېردە اېدىنگ؟

- اېشىگىمىز يانيدە اېدىم.

بى-بى يقە سىنى اوشلب، «توبە-توبە» دېپ، سۈرەيدى:

- كىمەلە اۋلدى اېكن؟ بىلالمە دىنگ مى؟

- ياغ. بىلالمەدىم. بىر نېچە كىچىك بالە و بىر نېچە قىرى و

يىگىت نى يىقىلگىنى و آھ و نالەلرىنى اېشيتىدىم. مېن اۋزىم مىنن اۋزىم اېدىم. اىپك ھم اۋشە يېردە بارمىدى، ياغ مىدى؟ بونگە ھم قرەمبەن.

- خدا نېرە گىنەم نى بىر تار ساچىنى ھم كىم

قىلمەسىن. بو گون نېمە اوچون مونداغ ساووغ گپ لەنى گېرەسن؟ انه،

اىپك جان گە قرە، فرشتەلە دەى ياتىيدى. اونگە قىسە ايتىپ- ايتىپ،

ياتقىزدىم. نېرە گىنەم راکت آوازى دن جودە قۇرققن اېدى.

- بېچارە قىزگىنەم. بى آتە بۇلدى. بو گون- اپرتە بى آتە ھەم بۇلىب قالر.

(بى بى تەجب و اچىغ ارەلش آواز بىلن):

- توبە قىلدىم، خداجان، توبە. سېنگە نىمە بۇلدى، اۋزى؟ بوگون مونداغ يمان نىتلە مېنن اويگە كېلدىنگ. ايسىتمەنگ بار دەى الجىرە- يسىن. خدائىم سېنى ھەم، نېيرە گىنەمنى ھەم، مسافر اۋغلىمنى ھەم اۋز پناھىدە اسرەسىن. ھەر كون اۋنلې يمان واقە بۇلىب تورگندە، ھەر كون يوزلې بېگناھ آدملە اۋلىب تورگندە، مونچە اۋلىم دن گىپرەسن!؟

اينجو ھۇكىرىب، يىغلەى باشلەيدى و مشتيدەگى غىجىم بۇلگن خطنى، بى بى گە اوزەتېب، مونگلى و اوزىق- اوزىق تاووش بىلن:

- آلىنگ... مەنە، اۋغىل جانىزنى خطىنى آلىنگ... ، اون بىر يىل اۋز ياغىم گە قورىلدىم، قان يوتدىم، غم چېكىدىم، بو آغىر شرايطدە، تورموش يوكىنى اۋز اېلكەمگە آلدىم، قىزىنى باقىب كتە قىلدىم، سىزنى اۋز آنەمدەى كۇرىب، سىزگە غمخۇرلىك قىلدىم. ھېچ قچان شكۈە قىلمەدىم، ھېچوقت اونى قرغەمەدىم ھەر كېچە اونى ساغلىگىنى خدا دن سۇرەدىم، ھەر كون اونى بىر خطى و خوش خبرى گە ايتتىق بۇلىب اۋلتىردىم، ساغ-امان كېلىشى اوچون نذرلە بېردىم. آخرى نىمە بۇلدى؟ قدرىمنى كىم بىلدى؟ يخشىلىگىم عوضىگە، يمانلىك، وفا و صداقتىم اۋرنىدە بېوفالىك و خىانت، جفا و ظلم تاپدىم. اۋغلىز بىر خط مېنن ھەم يخشىلىك لرىم نى ادا قىلىپ بۇلدى. باققن اۋغلىزگە آفرىن!

(بى بى قووناق آواز بىلن):

-اوغیل گینەمنى خطى كېلىدى مى؟ خداگە شكر. كۆزىنگ  
 آبدىن. عىنكىم نى بېر. بالە جانىمنى خطىنى اۇقىپ، كۆزىم ياروغ و يوره  
 گىم شاد بۇلسىن.

خط نى اينجو نىنگ قۇلىدن آلىپ، غىجىم لرىنى تزهسى اوستيده  
 آچىپ، عىنكىنى آلگنى بارەدى. عىنكىنى تاقىپ، خط نى اۇقى باشلە-  
 ىدى.

اينجو هق-هق يىغلىشنى دوام بېرىپ گېرەدى:

- بىر جوالى دەى يوك تاشىدىم. بىر چۇرى دەى خدمت  
 قىلدىم. بىر عاشق دەى، كېچە و كوندوز اونی هجرىگە تلىپىندىم، بىر آنە-  
 دەى اونی القەب يوردىم. آخرى نىمە بۇلدى؟ خالە جان، كۆزىز آبدىن.  
 شونداق مرد اۇغىل نى باقىپ، كتە قىلگىز اوچون هر قنچە مختەنىب  
 يورسەيز، هر قنچە فخرلنەيز، بۇلەدى. خطىنى اۇقىنگ. بلند بلند  
 اۇقىنگ. اۇغلىز نى گپ لرىنى ىنە بىر بار سىزنى آغزىز دن اېشىتسىم  
 ىخشى بۇلەدى. قنى، بو خط نى اۇقىپ، سىز نىمە احوال گە توشەپكن-  
 سىز؟!

بى بى پریشان و حيران اينجو گە قرەب، شېهەلى آواز بىلن:  
 - اينجو قىزىم، مونداغ گېرمە. مېنى قۇرقىتەسن. بو خطدە نىمە  
 يازىلگن كە مونداغ يىغى-سىغى قىلىپ اۇلتىرىپسن؟

- اۇقىنگ، اۇقىنگ. بو خط اېمس، بو قىمتلى پارسىل! اۇغلىز  
 چىت اېل لردن بىزگە مخصوص ساوغە-سلاملە يىبەرىدى. بوندن  
 ىخشىراغىنى يىبارىپ بۇلمەيدى. ھېچكىم حاضرگچە مونداغ پارسىل  
 يىبارمەگن. فقط سىزنى عزيز اۇغلىز مونداغ ساوغەنى يىبارىش گە قادىر!

- اى خىدايىم، بو نېمە كۆرگىلىك؟ سېنى ھېچ قچان مۇنداغ  
 حالتدە كۆرمەگەن ئېدىم. سېن ھېچوقت مېنگە حتى كە بلندراق آوازده هم  
 گېيىرمەگەن ئېدىنگ. بىر خط سېنى شو احوالگە سالدى مى؟ اوندە نېمە  
 يازىلگەن، آخى؟

- مېن ھېچ نېمە آيتالمەيمەن. تېلىم بارمەيدى. عار - ناموس  
 مېنى اۆلدېرەدى، كۆيدېرەدى، كۆلېم نى كۆككە ساورەدى. ئېندى خىدان  
 فقط اۆلېم اېستەيمەن، اۆلېم.

- خدا قىلمەسېن. بو قرغىش لىرىنگ تاغ و تاشلەگە بارىب  
 تېگسېن. الھېم ھەمىشە ساغ - سلامت بۆلېب يور. اۋغلىم و نېرەگىنەم  
 مېنن اوزاق ىشە.

- اۋغلىز ئېندى بىزدن آيرىلىپ بۆلدى. ئېندى اونى بىزلە مېنن  
 اىشى ياغ.

- آغزىنگ نى يىخىشى گپ مېنن آچ، قىزىم. اۋغلىم ھېچ قچان  
 مۇنداغ نامەقول نى قىلمەيدى. اۋزى ساغ - سلامت اېكن مى؟  
 - خط نى اۋقىنگ، اوندە اۋغلىز نېمە شاھكار قىلگىنىنى يىخىشى  
 بېلىپ آلەسىز. اى خدا، مۇنداغ كۈن نى كۆرستگەن كۆرە، بىر بار  
 جانىمنى آلەسنگ بۆلمەس مېدى؟

بى بى دىم آلىپ، تۇختەب، تۇختەب اۋقى باشلەيدى:

- اينجو جان، سلام. يېتى يىل دىن كېيىن شۇنداق خط يازگىم  
 اوچۇن خىجالتدە مەن. اۋزىنگ بېلەسن كە شو يېتى يىل اىچىدە، قنچە  
 اورىنمەيىن، بىران درىست راق اىش و كوچگە اېرىشالمەيدىم و شو سېبلى  
 سىزلىرگە ھەم مادى ياردەم كۆرسە تالمەيدىم. سېنى، قىزىمىزنى و آنەمنى  
 ھەم اۋز يانىمگە چىقىرىپ كېلتىرالمەيدىم. وطن گە، سىزلىرىنىڭ يانىڭىزگە

قَیتیشیم ھەم امر محال اېدى. مېنى توتسەلەر، اۆلدیرمەى قۇیمس اېدیلر. یېترلى چە پول تاپیب، سیزلرگە ییباریب، سیزلرنى اۆز یانیمگە چقىرماقچى بۆلدىم و بونینگ اوچون قيلمەگن ایشیم و بارمەگن جاییم قالمەدى، اما برچە اورینیشلریم ضایع کېتدی. بو یاق دە قبول ھەم بۆلالمەدیم. مېنى بو یېردن ھیدەب ییباریشلری ھەم احتمال دن خالی اېمس اېدى. آخرى تقدیر بیر یاش گینە ببوہ ییلن مېنى اوچرەتدی. او، ھەم یخشى پولدار و ھەم بو یېردە قبول بۆلگن. مېن ناچار اونگە اویلندیم. امیدیم شو اېدى کە اونینگ پول لری ییلن یا کە اۆزیم ھەم قبول بۆلگندن کپین سیزلرنى بو یېرگە چقىرسم، اما تۆى دن کپین او، مېنى قۇرقیتیپ، پولیس گە عایلەلى بۆلەتوریب، ایکینچى عایلە قورگنیمنى خبر بېرىشىنى ایتدی. یگانە یۆلى سېندن اجرەلیش اېدى، خلاص.

مېن سېنینگ برچە فداکارلیگینگ نى، یکەلیکدە، عیال بۆلە توریب، قیزیمیز و کسل آنەم گە یخشى قرەب، مېنى یاردیمیم سیز اوى- رۇزگارنى تېبرەتیب تورگنینگنى بیلەمن. کسل گە قرەش، اونینگ اینجیق لیکلرگە چیدەش، کپچکینە بالەنى ارداقلب، یوویب- ترەب تریبە قیلیش آسان ایش اېمس لیگینى یخشى بیلەمن و شونینگ اوچون، وجدان عذابیدە کویب، مونداق قۇرقاق لیگیم و قدر بیلمس لیگیم دن سېن، قیزیمیز و آنەم آلدیدە شرمندە و شرمسارمن.

سیزلرنى بوندن کپین ھېچ قچان کۇرالمەسم کبرەک. البتە کۆزیم کۆزینگە توشسە، خجالتدن سوو بۆلیپ، اۆلیب قالیشیم ممکن. مېن لاعلاج بو خط آرقەلى سېنى اۆز نکاحیم قیدی دن آزاد قیلە من. مېن سېنگە مناسب اېمس من. سېن جدا گوزەل، وفالى، فداکار، مهربان و معصوم عیال سن. البتە سېنینگ قدرینگگە یېتەدیگان مرد ایرکک

تاپىلىپ قالىشى و سېنى بختلى قىلىشىگە ايشانەمن. اگر بير كون شونداق كىشىنى اوچرەتسنگ، او بىلن بېمالال تورموش قورىشىنگ و ينگى حيات باشلەشىنگ مەمکن. او حالده مېنگە خبر بېرسنگ، قىزىم و آنەمنى اۈز آلدېمگە چقىرىپ آلەمن. يۇق دېسنگ، هر آى سېنگە پول يىبارىپ تورەمن. مەمکن بۇلسە، مېنى كېچىر و بو بېوفا و نامردنى بوتونلە-ى اونوت.

سابق اېرىنگ و حاضرگى خالە بچەنگ «شىيان»  
(تېك تورگن بى-بى، خطنى اۋقىب-اۋقىب، خالدن تايىب،  
ديواردن اوشلەيدى و خط اداغىگە يېتگچ، تىز چۈكىب، نالە قىلە باشلەيدى):

-ۋاى نامرد، ۋاى ناسپاس، كۈرەمك. بو نېمە قىلگەنىنگ؟ بو قىنداغ رسوالىك! شو پىرگە قىتىپ كېلىپ، دشمنلر قۇلىگە توشگەنىنگ يىخشىراق اېمس مىدى؟ قۇرقاق، شىرمندە، بې غىرت! اۈلگەنىنگنى اېشىتسەم، بير-ايكى كون يىغلب، كېين سېنگە فخرلىنىپ يورېدىم. اېندى عمر بۇيى سېنى قرغىب، سېندەى اۋغىل توغىب، شونداغ تىرىيە بېرگىنمىدن اويالىب، عذاب چېكىپ يورەمن.

(قۇلىنى آسمانگە، دعاگە كۈتە رىب)

-اى خداجان! موندن آلدېن ايكى اۋغلىمنى و ياش اېرىمنى شهادت شىرتىدىن اىچىرىپ، عرش اعلاگە، اۈز الدىنگگە چقىرگن اېدىنگ. اۋشندە، يىغلب سېندىن شكۈه قىلگن اېكەنم. اېندى مېنى كېچىر و ناشكرلىگىم اوچون، بو نامرد اۋغلىمنى قىلگن ايشىگە لايىق جزا بېر. اى خدا، بو داغ كۈرگن و مصىيت چېكەن آنەنى دعاسىنى قبول آيلە! خواھلەسنگ، اۈلدىر، خواھلەمەسنگ، شونداغ عذاب-عقوبەتلرگە دچار

قى كە ھەر ساعت اۋلىمى گە راضى بۇلسىن. الھىم ھېچ قچان اونگە ياروغ كوننى كۆرستمە، الھىم ھېچ قچان بخت و شادلىكنى اونگە نصيب اېتمە.

(يىغلب تورگن كېلىنىنى قوچىپ، يىغلى ى باشلەيدى)

- بختى قرا بېچارە قىزگىنەم. كاشكى مېن اۋلىب كېتسە بېدىم و مونداغ شرمندەلىكنى كۆرمىسە بېدىم. او دنيادە نامراد سىنگلىم گە نىمە جواب بېرە من؟ او سېنى، اۋغلىم گە بېرماقچى اېمس اېدى. مېن قنچە يلىنىپ، وعدەلە بېرىپ، اونى كۆندىرگن اېدىم. بېچارە سىنگلىم، بو نامرد اۋغلىمنى مېندن يخشىراق تانى بكن. كاشكى سېنى كېلىن قىلمسە بېدىم. سېنى بختلى و اېركە كېلىن قىلەمن، دېب اۋن يىلدن بېرى عذاب- عقوبت لەگە دچار قىلىپ كېلدىم. بشقە محنت و غم لرىنگ كم اېكن، اېندى بونىسى ھەمە سىدن ھەم آرتىب كېتدى. خدا اۋشە نابكار اۋغلىمنى اۋز غضبىگە دچار قىلسىن. مېنى كېچىر، قىزىم. شونداغ شرمندە و بېچارە خالەنگ نى كېچىر!

اينجو دېوار دن اوشلب، اۋرنىدن تورەدى و مست لردېك اياغىنى يېرگە سودرەب، قلىتېرەب- قلىتېرەب قىزى ياتگن يېرگە بارەدى. اونىنگ يىغىسى استە- سېكىن، اما قېين آنە سىنىنگ زار- نالەسى بلندراق اېشىتىلەدى. قېين آنە سى ھەم اونىنگ آرتىدن سالانە- سالانە يورىپ بارەدى و اېپك يانىدە، بىر- بىرلىگە قرشى اۋلتىرە دىلر.

- خالە جان، اېندى نىمە قىلەى؟ (تيتراق آواز بىلن) بو خطنى اۋغلىز نى اۋرتاغى دفتىرىم گە كېتىرىپ بېردى. اۋشندن بېرى يوزلب فكر و خيال باشىمدە ايلنەدى. اول اۋزىم نى اۋلدىرماقچى بۇلدىم، اما سىزنى و قىزىم نى اۋىلپ، خدادن قۇرقىپ، بو ايشگە قۇل اورمەدىم. كېين

سېزىلرنى تشلېب، باشىم نى آلىب كېتەي دېدىم. يەنە سىز و ايېك كۆز  
الدىم دە توردىلە. يۇلىمنى يۇقاتىپ قالدىم، خالە جان. نېمە  
قىلىشىمنى بىلمەيمەن. قوم و قرىنداشلە، دوست و همكارلىرىم آلدىدە  
قنداق باش كۈتەرىپ يۈرەمەن؟ يۇلدە بېران موتر اوريپ تشلەيدى  
مى، دېب يۇلنى اۋرتە سىدن يوريپ كېلدىم. اما اجل ھم اۋغلىز دەي  
مېندن قاچدى. كاشكى شو راکت مېنگە تېگىپ، دنيا غمىدن و بو  
شرمندە ليكدن مېنى قوتقرسەبدى.

- خدا قىمە سېن، قىزىم. خدا اونى و اوياتسىز خاتىنىنى  
اۋلدىرسىن. مېن اون تە شونداغ قۇرقاغ و نامرد اۋغىلنى سېنى بىر تار  
ساچىنگە تېنگ قىلمەيمەن. مونداغ گېيرە، جان گېنەم. مېن ھمىشە  
سېنى يانېنگەمەن. ھەر عذاب و راحتدە سېن مېن بىرگە بۇلەمەن، قىزىم.  
او، سېنى لايىقىنگ اېمس اېكن. اونى يۈرەگىنگەن چىغەرىپ تشلە. مېن  
اونى شو كوندن باشلېب، اۋلگەن دېب، حسابلەدىم. سېن ھم اونى اۋلدى،  
دېب اونوت.

- بو يۈرتدە عياللار تەقدىرى ھمىشە شونداغ. عمر بۇيى اېرلىرىنى  
خدمتى و احترامىنى قىلەدىلە، وفا و مېربانلىك كۈرستەدىلە، يۈرەك  
كويديرىپ، روز و روزگارىنى بوت قىلەدىلە، اما اېرلىرىنى يېرىم ناننى بوتون  
بۇلسە، بس. اۋشندە درۋ ياشراغ و گۈزەل راغ قىزنى تاپىپ، ياشلىگى،  
ساغلىگى و بارلىگىنى اولەگە بېغىشلەگەن خاتىنلىرىنى تشلندى قىلىپ  
قۇيەدىلە يا كە مېن بېچارە دەي، طلاق بېرە دىلە.

(اويدە يەنە بىر پارتلىش آوازي اېشيتىلەدى. اينجو اۋزىنى ايېك  
اوستىگە تشلەيدى. صحنە نى توتون و غبار باسەدى، چراغلر اۋچەدى و  
صحنە قرانغولىكدە قالەدى. بىر نېچە لحظە دن سۇنگ صحنە يەنە دە

ياختى لىنەدى. بى بى و اينجو قانگە بۇيەلىپ ياتىدىلار. ايپىك قۇرقىپ،  
يىغىلب، گاهى بى بى سى و گاهى انە سىنى قىمىرلىتىپ:

-انە جان، كۈزىنى آچىنگ، مېن قۇرقەمن، راکت نى آوازىدن  
قۇرقەمن. انە جان، مېنى قوچاغلىنگ. بى بى جان، مېنى قوچاغىزگە آلىپ  
يشىرىنگ. مېن مېنن گىپىرىنگ، مېن قۇرقاتىدىم. انە جان، بى بى جان

...

(ايپىك، انە سىنىنگ قوچاغىگە كىرەدى و باش برماغىنى سۈرە  
باشلىيدى. مونگلى موسىقى ترەلىپ، پردە توشەدى.)

## يازووچى حقيده:

دكتور شفيقه يارقين ۱۳۳۳ يىلى، قوس آيى نىنگ ۳-نچى كونيده سرپل شهريده توغىلگن. مکتب دورهلرينى مزارشريف و كابلده بيتتيرىب، ۱۳۵۵ يىلى كابل پوهنتونى، تىل و ادبيات فاكولته سىنينگ ژورناليزم بۇلىمىنى توگتدى. او ۱۹۹۸ يىلى اۆزبېكستان علوم اكادىمىسیدن فاللوژى فنلرى بۇيىچە دكتورلىك علمى درجه سىنى آليشگه ابريشدى.

دكتور شفيقه يارقين مىلى رادىو-تلويزيون ده ادبيات بۇلىمى مديرى، افغانستان علوم اكادىمىسى، سنا نشرات رياستى، جوزجان خاتين-قىزلر شوراسيده رييس، جوزجان عالى تحصيلات مؤسسە سيده استاد، عياللر وزيرليگيده معين، اۆزبېكستان علوم اكادىمىسيده كته علمى

خادم، معارف وزیرلیگیده مشاور و تربیوی ایشلر ریسی کبی وظیفه لرده ایشلگن.

او، قریب (۳۰) ییلدن بیری علمی ایزلنیشلر همده بدیعی ایجاد ایشلری بیلن شغلنیش کېلماقده. اونینگ (۱۵) ته کتاب و رساله سی، (۳۰۰) دن آرتیق مقاله، شعر و داستانلری اؤزبک و دری تیللریده اولکه و چیت اېل مطبوعاتیده نشر اېتیلگن.

دکتور شفیه یارقین تانیقلی علمی، اجتماعی و سیاسی عیال سیماسی صفتیده کؤپلبل ملی و خلق ارا کنفرانس و سیمینارلرده افغانستان و چیت اېللرده فعال قتنشیش، سؤزگه چیقن.

او، «بابر خلق ارا فوندى» نینگ آلتین مدالی، حکیم ناصر خسرو ادبی جایزه سی، «مجما» نینگ آزادلیک جایزه سی و باشقه بیر قطار مدال و جایزه لرنی آلیشگه اېریشگن. «ینه کؤریشگونچه» اونینگ باسیلگن بیرینچی حکایه لر تۋپلمی دیر.